

**John Sut Kipana Thupha
Hilchet
(Bung 1 - 9)**



Kaikhothang Singsit, M.Th.

**Christian Education Department
Thadou Baptist Association (India)**

John Sut Kipana Thupha Hilchet

by : Mr. Kaikhothang Singsit

Published by:
Christian Education Department, TBA (I)

Year of Publication : 2017

Copyright Reserved

No. of copies ; 400

Price : Rs.

Printed at :
Creative Compu Print, Imphal.

KIPA THUPHON

Thadou Baptist Association - India noi ja um Christian Education Board in agelkhohpenchu Christian Literature semhoidinghi ahi. Hichetohkilhonchun Mr. KaikhothangSingsit, Principal NTS in lunggiltah'aahinjih"**John Hilchet**" hi TBA-I Christian Education Board adiatohdohlentahahunghitan ahi. Hichelekhabu hi phatchompitheitahlehlhagaolam'amachalpitheitah ahi.

Hichelekhabuinhij, MrKaikhothangSingsit, Principal NTS chungEdn. Board thalhenginkipathusangtahkahinphongin ahi.

Hichelekha Bu hi alen, aneo, milhamgeijinasim a aphatchompitheilekhabu ahi.

Pathen in asimjousephattheibohjingtahn.

Mr. Paougoulen
Secretary
Christian Education Department
TBA-I.

LEKHABU CHUNG CHANG LEH JILKUNGHU HETDING

Amasan hiche “John Sut KipanaThupha” lekhabu hi Thadou Baptist Association- India, Houbung tinna Sunday School Syllabus a choithei dinga Christian Education Board Literature Committee (TBA-I) in tahsanna neitah-a ngansena einanei jeh-un, mopohna nei lamkai ho chung a kipa thu sangtah-in kaseijin, chuleh Pa Pathen thangvahna kapen ahi. Hiche John Sut KipanaThupha lekhabu hi, Pathen Thu hetgilna sangtah tah neihon nasatah-a agelsangun, hicheto lhon chun Hilchet Bu jong tampi akisun doh-in ahi. Hitia mitampin Pathen thugiltah tah tampi akimudoh jingnao, hiche Gospel hi phatah leh lunglut tah-a simhon Pathen thugil tampi akimu dingu kakinem’ in ahi.

Hiche Khutchoibu hi simlai ho hiuhitin teachers (jilkungho) hijeng jongleu hen iman kop dinguva hetbailam tah-a kiseum ahin, phatah leh lunglut tah chet-a isimuva ikihil khom diu hi doile tup pen tah ahi. Chule ahideh-a Jilkunghon isutmil louhel dinguva dei um point som nojahin ahin kitah langin ahi:

1. PathenThuhing hil ding nahitah jeh-a athunei pa Pathen henga chihna, hetna chuleh thepna nakithum tei ding ahi.
2. Pathen panpina nathum toh lhona kigotna phatah-a nanei ding ahi.

3. Simmun hohi abung aching abih bih cha kigollha ahijeh-in, nahilna ding simmun chun chang (verses) ijah ahop em ti phatechan ven.
4. Hichangei hi ahi tina hetdoh joutengle hiche Khutchoibu hi simpai jeng louvin na Bible kilah-in lang, vetsahnan John 9:1-17 sung ahileh phongdoh in lang koijin koihokomma itobang dinmuna hiche thu hi aseï ham, ahiloule koijin ipi abol ham, ahilou jongle koile koi kihoulimna ham ti phatah-in hetdoh ding ngaiton.
5. Ipithu um ham ti nahetdoh theina dinga chu khatvei nivei goh hilouva athusim nahetdoh kahsea nasim ding ahi.
6. Avel vella nasima athu chedan nahet them thei tengle hiche khutchoibu hi sim lechun nahet them soh thei ding, hiche khutchoibu sunga kisun kalvalla jong Pathen'in hetna napeh be ding ahi.
7. Lunglut tah-a nasima athu chedan nahet themsoh-a chun ngajeng louvin kahetna hi itile kami hil ho kapeson thei dem tihi naha ngaitoa, mihon bailam tah-a ahet thei teina dinguva nakiha bol angaijin ahi.
8. Pathen thu hin mihem hinkho nasatah-in akikhelsah theije ti hepuma, namihil hon Pathen thu ahet uchu alhagaovu hinkhoa amanchah theina diu tampi umho jong nalah doh-a napeh son tei ding ahi.

9. Bible hihen hiche Hilchetbu hijongle nasima nahet themthei lou aumle lekhabu dang John Gospel toh kisai jong simmin.

10. Simmun kigondan hi abangloi Part-1 Part-2 tia kihomkhen jong aumin Jilkhung hon hethemna neijin aphan, hitoh lhona hiche Khutchoibu hi Bung 9 changei bou kibol ahin aban umkit ding ahi.

Pathen thu'n mihem hinkho nasatah-in akikhel sah theije ti hepuma lunglut tah-a simma chuleh hil ho jouse Pa Pathen'in vangbohna peta hen.

Author

Asunga thu umho

1. John Gospel Nunglam thu Part-1
2. John Gospel Nunglam thu Part-2
3. Thu chu tahsaphe ahungsoh tai
4. John Baptist in Jesu thudol ahettohsah
5. Jesu Seijui masa ho
6. Jesu thilkidang bol masah pen
7. Jesun Jerusalem Hou in asuh theng
8. Jesu leh Nicodemus kihoulim
9. Jesu chung chang thu john Baptist in ahettoh sah
10. Jesun Samaria khopia na atoh
11. Jesun Miloupi pa chapa adamsah
12. Jesun Nakong chatmopa adamsah
13. Jesun a Pathen hina aphondoh
14. Jesun mi sang nga avahva
15. Jesu Hinna changlhah ahi (part 1)
16. Jesu Hinna changlhah ahi (part 2)
17. Kut laiija Jesu thuhil themmo kichan (part 1)
18. Kut laiija Jesu thuhil themmo kichan (part 2)
19. Ajonpet tah-akiman Numeinu
20. Jesu thuhil Juda hon anelkal'u (part-1)
21. Jesu thuhil Juda hon anelkal'u (part 2)
22. Jesun apenna Mitcho khat kho amusah (part-1)
23. Jesun apenna Mitcho khat kho amusah (part 2)

SIMMUN-1

THUPI: JOHN GOSPEL NUNGLAM THU

THULU: Hicheng thu hettosah-a, chule hicheng thu suna hi hiche seijui chu ahin; chule ama thu hettosah chu tahbeh ahi ti kaheuve (**John 21:24**).

LEKHABU CHUNG CHANG

Hiche Gospel alina, John Gospel tia mijousen i-hetnu hi Gospel dang ho tekahnan, Mathew, Mark chule Luke hocheng ho hitoh akibah louna tampi aumin, vetsah nan Mathew chun Jesu Leng (King) ahina ahaseijin, Mark in Jesu chu Soh (servant) ahina chule Luke in Jesu milungset them ahidan, miho datkhen na beihel'a ajen dan leh Jesu thusim aha seijin, hinla hiche gospel John hin vang Jesu chapa changkhat set chun Pathen lim chu mihem te laha aphondoh ahitai ati. John 1:18 "koiman a-imatih chanin Pathen chu amukhapoi, Pa oma beh jing Pathen chapa changkhat set chun aphondoh ahitai." Hitabanga gol'a hi jatchomna chom chom phabep aneitah jehin mitampi din hetchet dinghi ahatsan, hinla lunglut tah-a sim ho ding'in vang bailam tah-a hetchet jengthei ahi, hijeh hin Leon Morris chun hiche gospel John aheth nop dan hi, Chapang holeh Saipi (elephant) ho kijapna thei (swim) twikul sung toh ana tekah leuvin ahi.

Hitia lekhabu sim nom umtah ahijeng vang hin, asunpa chung chang, kojijin ana sut ham tihi kinel na tuni chanin aumjing'in ahi. Ajuh pentah chu ahile, asunpa "John, Jesu seijui" holah-a

khat ahi ti'a kiminphat na aum lou jeh hipen dingin tahsan ahi. Hitia lungel jatchom chom tampi aumtah jeh hin Johannine scholar hon (John Gospel hetgilna neiho) koisut ham tia hetdoh nadingin jatnin kholchil na anei un hichu ahile "external & internal evidence" (a lekhabu sunga kona asunpa photchena chule pamlam'a kona photchena) tin ahom khen'un, hichu noiya banghin akipen ahi.

EXTERNAL EVIDENCE (Lekhabu polam'a konna photchena)

John sut kipana Thupha sunga kimulou lekhabu dang danga konna John sut ahi tia seihon, hiche gospel ali chana "John sut kipana thupha" hi Jesu seijui John sut mong ahi tihi Ireaneus chun kum jabih nina achailam chun photchena anapen ahi. Ireaneus in aseibe na a chun Pakai Jesu seijui phat seh-a Pakai omma beh jing jeng ngailut seijui (beloved disciple) John chun hiche gospel hi Asia gamma um Ephesus khopi, mitheng Paul'in houbung anatumgdoh na mun'a aumlaija John amatah in hiche gospel hi ana sut a chule simdoh thei dinga anasodoh ahitai ati.

Eusebius in aseibe na a chun hiche chung changa Irenaeus in hangsan tah-a photchena apeh thei na ajeh pentah chu ahile, Irenaeus (120-202 AD) chun Polycarp henga Jesu seijuiho thusei anajah son chu aloi ngaitah Florinus henga alekha athot na-a konna kimudoh ahi ati. Tahsan theilom tah ahina chu Polycarp hi milui tah 156 AD, a kum 86 ahi'a martyr anachang ahin, aman seijui ho henga athu het ho le jahson ho chu Ireaneus in ana het'a hichu photchena anapeh ahi.

Hiche thudol hi Tertullian, Clement of Alexandria, chule Origen, ho cheng jonghin ana pom peh sao ahitai. Hinla, hiti'a mimasa hon photchena ana peh ho hi tukhang geija Bible scholars tamtah lungilla anachang thei pon, hitia asang theilou jeh u-hin

“Pakai seijui John hin hiche gospel hi sun ponte” tin lungel aneijun ahi. Ajeh chu hiche seijui John hi hiche gospel kisut masang peha thi’a kiseija ahitai atiuvin ahi. Scholars ho chun hiche gospel sun ding hin ginchat tampi aneijun hiche ho chu ahile: Jerusalem’a umJohn, John Mark, Upa John le Lazarus. Hitia ginchah tampi aum jeng vang hin hiche pa mong mong ahi ti hi koiman kicheh tah-in aseï thei pouvin ahi. External evidence chun “John” Jesu seijui chu hiche lekhabu sunpa ahi ti photchena apeh jeng vang’un khonunga scholar ho kinelna (abang chun John sut ahimonge/ahipoi) ti ahungsoh tan ahi. lunggel chom chom sohdoj jingle hichelaija houbung Upa atamjo dei dungjui chun Jesun angailut seijui John sut ahi tin kinoptona ananei jun ahi.

INTERNAL EVIDENCE (Lekhabu sunga konna photchena)

A lekha bu sunga thu umho a konna Zabedee chapa Jesu seijui John sut ahi tia kichet tah-a akimu lou vangin Bible scholar phabep in John sut mong ahi ti phochena apeovin hiho lah-a hetgilna neitah B. F. Westcott kitipa hin noiya bang hin bannei chan photchenna apen ahi.

- i) Hiche gospel sunpa hi Palestine Judah mi ahin, agamsung (Palestine) umdan hethem na aneije. (1:28; 11:18; 3:23; 5:2; 9:7; 18:1; 19:13). Thil umdan ahethem dang ho; Shalom twikul (9:7), Kidron vadung and (18:1), Bethany (1:28; 12:1), Galilee a umCana (2:1; 4:46; 21:2), Tiberias (6:1; 21:1), Sychar (4:5), Mt. Gerizim (4:21), Ephraim (11:54).
- ii) Asunpa hin Hebrew Bible le Greek paova kiledoh Bible jong apomin ahi:
 - a) 12: 38, > Isaiah 53:1
 - b) 19: 24, > Ps 22:18

c) 10:34 > Ps 82:6

d) 15:25 > Ps 34:19

- iii) Hiche gospel sunpa hi Juda mi ahi toh lhonin Judaho chon dan hetna anei'in, vetsah nan Judah te "Kut" kiman dan Passover (kalchuh kut), Tabernacles (lhambuh kut), (1:21, 4:25, 6:14 ff, 7:40 ff, 12:34 ff, 18:28), Judah te chena lhonpi alhangpi a Numei kivet nem dan jong het chilna anei'e (4:27), Sabbath chung chang (5:10; 7:21–23; 9:14 ff.), apu apa teo chonset achate ho chung a chuh dan (9:2).
- iv) Hiche gospel sunpa hin thilsoh umchan jouse amit tah-in amui:
 - a) Nicodemus (3:1 ff, 7:50; 19:39)
 - b) Lazarus (9:1 ff; 12:1 ff)
 - c) Judas Iscariot chungthu hetchil na anei je (6:71; 12:4; 14:22)
 - d) Mary'n thao namtui Jesu anu (12:3)
 - e) Jesun Peter jah-a "neingailut em?" (21:17)
- v) Hiche gospel sunpa hi Pakai Jesu seijui ho lah-a khat ahi
 - a) Seijui danghon hahsah na ato aheth peh in ahi (2:11, 17, 22; 4:27, 6:19, 60 ff.; 12:16, 13:22, 28, 21:12).
 - b) a sunpa hin Pakai lungput hethem na anei jin ahi (11:33; 13:21)
- vi) Hiche gospel sunpa hi Jesu seijui John Zabedee chapa ahi:

- a) Hicheng thu suna hi hiche seijui chu ahi (21:24)
- b) Hiche chun Jesun angailut seijui Peter jah'a Pakai ahi ati (21:7)
- c) Suijui dang ho (21:2)
- d) Hiche ngailut seijui hi indan chung a Pakai jan anjon aneh uva jong chun apange (13:24)
- e) Hiche ngailut seijui hi seijui holah-a jong kiminphat jingkhat ahi (20:2-10; Mark 5;37)

Hitia kicheh tah-a John amatah sut mong ahi ti akimu lou vang'in, chung a seijui ho henga thujason hon photchena apah naban uva, alekha bu sunga kona kimu ho akonin hiche gospel sunpa hi ngailut seijui John hinte ti hi kinelna tampi aumjeng vangin tahsan pen ahijing nalaijin ahi.

THUDOH:

1. Mathew, Mark chule Luke chengtoh John Gospel kibahlouna seijin.
2. Leon Morris in John sut kipana thupha iti ahilchet em?
3. Ireaneus in John Gospel sunpa chungchang thu iti aseijem?
4. John Gospel sunpa Juda mi ahitoh lhonna Judate chonle khan ahet ho bannei chan seijin.
5. John Gospel koi sut ham tia lunggel kibah louna tampi ho lah a nangma geldan ipi ham?

SIMMUN-2

THUPI: JOHN GOSPEL NUNGLAM THU

THULU: Chule hicheng tailouvin jong Jesu thilbol tamtah aumin, hitiho chu abonchan kisun sohkeile, kei ngaiton, lekhabu kisun chengse chu vannot leiset hin dolponte. Amen (**John 21:25**).

JOHN GOSPEL KISUT PHAT LE AMUN

Hiche gospel John hi hoilai muna konna kisun ham chule itih phat lai ja kisun ham ti hi donbut abai behseh pon ahi. Khang masa ho tahsan le ginchah dungjujin John Zebedee chapa chun Asia Minor'a um Ephesus khopi a aumlai'a anasut ahitai akiti. Ajuh chu hiche John 'lekha bu' hito lekhabu dang dang tichu Colossians, Ephesians chule Revelation, hocheng hitoh akibah na phabep aumin ahi.

Hiche gospel kisut phat chung chang'a hin lungel jah chom chom aumin, abang khat chun 70 A.D, Jerusalem Temple kisuh chim masang hinte tin ginchat na aneijun, abangloi chun 81-96A.D, Domitian lengvai poh lai hinte tin aseijun ahi. Geldan tapi umjonglehiche gospel hi kumjabih khatna kichai kon lam Jerusalem Temple kisuh chim masang 70 A.D. vel ahiding tahsan aum penin ahi.

AKISUT LONAAJEH

Hiche gospel John kisut lona pentah hi ginchah chule tahsan tapi aumin ahi. R.E. Brown chun hiche John's gospel hi

chêh chaova um Juda ho, Jesu Christa dinga thingam'a pang ho Jews society akon chule Synagogue muna kona kinodoh-a genthei tah leh lunglengvai tah-a umho dinga kisun ahi ati. Meeks in jong Brown sei toh kilou thimin hiche gospel hi mihem jat khat/nam khat, nothap'a umho chule Judah ho houdan toh kitoh lou tahsan na anei jeh uva Synagogue a-kona kinodoh ho lhamong tah-a Jesu Christa akolchah jing uva tahsan na det tah anei thei nading uva asut ahi ati. Alang khat in Stratan chun John hin hiche gospel hi amite thuhil lhemho a-konna akikangse thei nadinguva tilkhon na a asut ahi ati.

Akisut lona ajeh pentah kicheh tah-in John 20:30-31 a akimun, *a)Hiti tah a chu Jesun aseijui te angung'a thil kidang tamtah abol ahin, hite ho chu hiche lekhabu sunga hin akisunpoi, b) Jesu chu Pathen chapa ahi natahsan uva, natahsan vang'uva ama mina hina nanei thei nading'uva, hichengse hi kisuna ahi.*"

Amasa, a) na-a kisei hi ahile Jesu anatoh, melchihna chule thilkidang tampi abol ho ahin, b) na-a hi, tilkhona le hilchahna, atahsan vang'uva hina anei ding dan'u tilkhon na a asej ahi.

Hiche chung chang gah hetbe dinga lomtah khat chu hiche lai khanga Judah ho jeng jong chu hop ni a kihom khen ahiuvin, abangloi chun Jesu chu Pathen chapa ahi ti dou dal loi, chule Pathen chapa dihtah Vana kona hung kumlha ahi ti tahsan'a thipi ngapcha jong ana um ahiuvin, amasa-a kisei atahsan lou ho Judah ho hihen adang dang ho hijong leu Jesu chu hingjing Pathen chapa dihtah ahi tia ahin tahsan thei nading uva tilkhon nadinga hiche Gospel hi kisuna ahi tihijouse nopsok kei ding doltah ahi.

JOHN GOSPEL SUNGA PATHEN THUGIL KISEI HO

Hiche gospel sunga Pathen thugil tah ho het doh thei nadinga het dinga ngaikhoh pentah chu Pathen chapa mihem'a ahung pen hi ahi. Hiche chung chang hi Bung 1:1,14 sung'in kicheh tah in akimui, "Atila chu Thu uma ahin, Thu chu Pathen toh uma ahi, chule Thu chu Pathen ahi." "Chule Thu chu tahsaphe ahung soh-in ilahuva ahung chengin..." (1:14a). Hiche chang teni hin 'Thu' tahsa phe ahung so dan kicheh tah-a ahilchen nabanin Vanoi mihem te mit mu theija Pathen ahung dan jong photchena akimun ahi. Hitia Pathen mihem'a ahung pen thu goh keuseh hilouvin hiche gospel sunpa hin Jesu Christa chung chang, Lhagaotheng, houbung thu chule Khonung ding thu ho jong kicheh tah in tahlang na aneijin ahi. Hiche ho lah-a chun John'in Pa Pathen le Chapa Jesu Christa chung chang thu asei achom lamin veo hite.

John sut kipana thupha sunga thil tampi umjong le amasa penna asunpa John'in adoipipen tah chu Pathen ahi. Ajeh chu Pathen amatah hi imajouse hungkon dohna ahideh-a achapa changkhat leiset mihem te chonset na a konna lhatdoh dinga mihem'a ahin pensah ahi. Hitia Pathen ahina le athilbol kidan dan ho aseigo hilouvin John hin, Chapa to akitimat lhon dan jong kicheh tah-in atah langin ahi. Mi loikhat chun Jesu chu tahsa phe ahung kiso masanga Pathen anahi tah le leiset mihem'a ahung pen'a chu Pathen aumtapoi tia gel jong aumin, hichu hilouvin, Jesu mihem'a ahung pen hin Pathen chu loupina chu aphondoh joh ahilouvin chule Pathen ahina jong chu mang louva angai'a umjing jeng ahi.

Pathen le Jesu Christa kitimat dan hi John hin kicheh tah-in Pa chu "Eisolpa" ahi ti noi'a chang ho hin aseijin (Jn.4:34; 5:38; 8:29). Hiche goh hilouvin Jesun "Kapa" tin Pathen chu

akouve (Jn.5:17; 6:45; 14:16). Jesun “Eisolpa” ati hin Jesu amatah ahung kondoh nale anatoh ho chengse hi Pathen ahi ti aphot chen ahi. Hiche hin avetsah hi Pathen’in Vannoiya anatong dinga Jesu ahinsol ahina le Pa le Chapa akingailut lhon dan akicheh chet jengin ahi.

John hin Pa le Chapa kitimat na tampi aseï toh lhonin Chapa Jesu Christa, Pathen Chapa ahimonge ti photchet na get (8) noiya hin akipei:

- i) Pa chun achapa ahinsol ahi Jn. 5:36 “Pan bolchai dinga eipeh kathilbol chengsetah hin Pa sol kahi chu ahettohsah ahi.”
- ii) Pan Chapa angailut chule thil jouse akhutna apeh Jn. 3:35 “Pa chun Chapa chu angailun chule thil jouse akhutna apetai.”
- iii) Chapa Pa a akingai dan, Jn.5:19 “Chapa chun ama chamin ima abol theipoi”
- iv) Chapa pa henga atao ve. Jn.11:41 “Pa, nangman kataona nangai jehin kathangvahe.”
- v) Pa le Chapa kitmat dan. Jn. 10;15 “Pan keima eihet bangin keiman jong Pa chu kahei.”
- vi) Chapan Pa Thu aseï. Jn. 15:15 “ka-Pa-a kona kajahho jouse aboncha nangho kahetsah soh nahitauve.”
- vii) Pa chun Chapa khut a imajouse apeh. Jn.13:3ff. “Pan thil jouse ama khutna apeh chule ama Pathena kona hungdoh ahia.”
- vii) Chapan Pa henga akile kit ding aseï Jn, 14:12, 14:28; 16:10, “keima ka-Pa henga kache ding jeh hin.”

JOHN GOSPEL SUNGA JESUN MELCHIHNA SAGI ABOL

- i) Cana khoa twisih Lengpitwi aso sah (2:1-11)
- ii) Capernaum'a Jalamkaipa sohpa adamsah (4:46-54)
- iii) Bethesda twikul'a nakong chatmo pa adamsah (5:1-18)
- iv) Mi sang nga avahva (6:5-14)
- v) Twipi chung Lam ajot (6:16-21)
- vi) Jerusalem'a mitcho khat kho amusah (9:1-7)
- vii) Athisa Lazarus ahindohsah kit (11:1-45)

JOHN GOSPEL SUNGA JESUN SAGI VEI KEIMA KAHl ATI

- i) Keima Hinna changlah kah (6:35)
- ii) Keima vannoi vah kah (8:12)
- iii) Keima kelngoi hongkot kah (10:7)
- iv) Keima kelngoi chingpha kah (10:11,14)
- v) Keima thokitna le Hinna kah (11:25)
- vi) Keima lampile thutah Hinna chu kah (14:6)
- vii) Keima Lengpi gui tahbeh kah (15:1,5)

THUDOH

1. Khang masaho tahsan dungjujja Gospel John hi kojjin hoilai munna aumpetna asut hintem?
2. R.E., Brown in John Gospel hi ipi jeh-a kojjin koiho dinga athot ahe ati em?
3. John Gospel kithot lona John 20:30-31 seijin lang chule hilchenin.
4. Gospel John sunga Jesun Melchihna sagi abol ho bannei chan seijin.
5. John Gospel sunga Jesun sagi vei 'Keima kah' tia asej bannei chan seijin.

SIMMUN – 3

THUPI: THU CHU TAHSAPHE AHUNGSOH TAI

Bible Simmun: John 1:1–18

Thulu: Chuin Thu chu tahsaphe ahung soh-in, ilah uva ahung chengin, keihon aloupina, Pa-a kona chapa changkhatseh loup chu, lungset le thutah dimsetnin kamutaove (**John1:14**).

Thumakai

John sut kipana thupha sunpa hin Gospel dangho tichu Matthew, Mark chule Luke ho cheng seito kibang louvin Jesu hungpen dan thu aseijin ahi. Chunga kisei ahideh-a Matthew le Luke in vang Jesu leiset naosen na ahung pen kicheh tah in aseigel lhonnin, John'in vang Jesu Christa atilla thua anaum, tahsa phe ahungso dan kicheh tah in aseijon ahi. Hiche John'in Jesu Christa amudan hi adangho mu sangin ajatchom beh'in hiche ho chu bannei chan veu hite.

I. Thu (Logos) (1:1-5)

Atilla chu thu uma ahitai (1:1). John'in 'atilla' tia thu apat jeng hin Genesis lekhabu a 'semtillin' ati hitoh akilona ahiloule akibahna umthim dannin akilangin ahi. Hinla phatah-a ivetleh Genesis in "semtillin" ati sangin hilaija John'in atilla ati hi amasa jon ahi. Greekte chun *Arkhe* atiuvin, hichu 'atil' ahiloule 'abul' tin akihen ahi. Hiche atilla patna um chu 'Thu' chu ahi tatin ahi. Hiche anaum 'Thu' hi ipi ham ti veleu hen; "Thu" kiti hi Greek ten *Logos* atiuvin ahi. Hiche "Thu" kisei hi angaina a mihemte kamsunga konna potdoh 'thu' kiseina ahipon, chujongle

Thulhunlui laiija Pathen'in athemgaote kamsunga konna ana phondoh sah thu jong chu ahipon ahi.

Pathen thu le hiche lekhabu kisut laiija mihemte hindan hetgilna neihon, hiche-a 'Thu' kiman kholgilna aneidungjui uvin, 'Thu' Jews ten *dabar* chuleh Greek ten *logos* atiu hi thil nasatah bolthei chule hiche thua kitem ahi atiuvin, nasatah'in 'Thu' kiti hi gelsangna ana neijun ahi. Hichelai khanga mihon nasatah-a agelthupiu ahitah jeh-a hiche 'thu' hi kimang hen lang Jesu Christa Pathen ahidan hi kiseiphong le mi tampin sang teijun te ti deisah najalla John'in hiche 'Thu' hi amanchah ahi tin Pathen thu hetgilna neihon aseu uvin ahi.

John'in aseina a hiche thu hi "atilla chu um ahitai" ati hin thiljouse kitem masang peh-in hiche 'Thu' (Jesu Christa) hi anaum ahitai ti aphochennin ahi. Aman hiche "Thu chu Pathen toh umma ahi" ati hin Jesu Christa (thu) chu tonsotna Pa Pathen toh uma anaumsa ahi atin, hiche thu ma ma chu Pathen ahi ati. Hiche hin avetsah chu Jesu Christa hi tonsotna anaum jingsa Pathen ahi ti aphochennin ahi.

Ama (Chapa) vanga thiljouse um ahi, ati hin Pathennin athilsem jouse asemna a hin Chapa Jesu Christa jong apange ti kicheh tah-in akimun ahi. Chapa a kon thil kitem ahidan noiija kipe Bible changho a akimmun ahi (I Corinthians 1:16; Hebrai 1:2). Jesu Christa vanga Pathen'in thiljouse asem ahi atina bannin, Jesu Christa a "hinna" aum dan aseikitnin, chule hiche "hinna" chu mihem te dinga "vah" ahi atikitnin ahi. Tahsa lam hihen lhagao lam hijongle hinna hi athupi lleh jengin, hinna beijin mihem aumtheipon ahi. Hichea Jesu Christa hinna ahi atihitah tahsa hinna pepa hijong leh ahidih-a lhagao hinna mihem ten inei diu pa hi adoipen ahi. Jesu amatah-in jong "keima thokitnale hinna kahi" ati (11:25). Hiche hinna chu vah ahi atin, 'vah' kiti hi Bible in Pathen chate toh atekah in ahi. Isaiah 9:2 na-a "muthimma vahle hon khovah amutaove" ati bangin Christa hung chu mitin dinga 'vah loupitah' ahung hitan, hiche "vah' chun muthim lah ahin

sallin hinla muthimmin anahepoi.” Persia te hou Zoroastranism thuhil chun “khovah le muthim” jonghi ahi atin ahi. Hiche tobang gol chun hiche “vah” (Christa) chun “muthim lah” (chonsetna gam) ahinsal jeng vanga mitam tah-in muthim joh chu ‘vah’ khella ana kilhennu ahitai tia John lekha Gospel sunpan anaphondoh ahitai.

II. John Baptist hettosah (1:6-8)

John Baptist pendolla Jesu Christa sanga peng masa le minthang masa ahina banna “Pathen’a konna hin kisol” ahidan akicheh chetnin ahi. John Baptist Pathen’a konna ahi akiti vingin ‘vah’ chu ahipon, hiche ‘vah’ thudol chu hettosah dinga hinkisol ahibouvin ahi. John’in vah thudol ahettosah hi thildang jeh ahipon, athu hettosah Jesu Christa chu mihon atahsan teina dingu ahi.

III. Vah tahbeh (1:9-13)

Jesu Christa Pathen’in ama vanga thiljouse ahinsem mitin salvah dinga hunga, vah loupe tah chu vangset umtah-in amiten santah sangin cross a anakhenbeh taovin ahi. Amaho gel chu Messiah chun agalmitu chemjammin hinsat chap jengle atiu ahi. Ahinal amaho gelbang lou hellin Pan Jesu Chista chu mihemte lhagao huldoh ding joh-a ahinsol ahin ahi. Ahin kisol Jesu Christa sanglou te chu alhangpin “amite” (Jews) kiti jong le amaho tahsan masah jalla tunia hi vannoijin Christa aheth ahin, tubanna jong ahethbe jing ding ahi.

IV. Christa mihemte lah-a ahungchen (1:14-18)

Greek ten *logos* (thu) atiu chu “tahsaphe ahungsoh tai”. Thubul lamma isei bangun Jesu Christa thil jouse kistem masang peh-a anaum jing tasa chu “tahsaphe ahung kisohtan ahi”. Christa mihemma ahungpen jeng hin a Pathen hina chu amansah ahipon, chule “tahsaphe” mihem te lim le mella ahung pen jeng vanga hi mihemte banga chonsetna aneilou chule boljong aboltheilou ahi. Paul’in jong kicheh tah-in Philippi 2:5-9 sunga, Jesu Christa Pathen toh kikot tenna umjing kineosah tah-a mihem limma leiset chungahung thu aseijin ahi. Christa kineosah tah-a hungpeng pa

chu John Gospel sunpan “lungsetle thutah dimsetnin kamu taove”
ati ahi.

Chunga 1:6-8 sunga John Baptist hettosah kisei khu John Gospel sunpa ngailut John’in John Baptist le Jesu Christa umdan sei khenna anei ahin, hinla hiche chang 15 na a kisei vang hi John Baptist in Christa umdan kicheh chetna kisei ahitai. John Baptist in pendolla Jesu sanga peng masa ahi akihet vangin Christa hi “keima masang peh-a umjingsa ahitai” atigoh hilouvin “keima sangin amasa jo tai” atin ahi.

1:17 Mosi danthu leh Christa; Pathen’in Mosi ana peh danthu chu Israel ding changbou kipe ahi kitile kiseival pontin, hinla Christa milungsetna vang hin Mosi dan akhokhella vannoi mi chitin namtin atahsan ho dinga scohatna ahitai.

Chapan pa aphondoh; Thulhun lui laiija pat thempu hihen themgao ho hijong leh koiman Pathen lim leh mel ana mukhah louvu ahin, Pathen’in jatchom chomma ana kihoupi ji bou ahi. Hinla hiche a hin Jesun, chapa changkhat chun Pa chu aphondoh ahitai ati.

Thuchaina

John Gospel sunpan Jesu Christa tonsot peh-a anaumsa Pathen toh anaum, ama vanga thiljouse kiseum, hinna vah chu John Baptist, ama jengin jong Pathen ahina aphondoh a Paathen hina puma tahsa mihemma ahung penna chuleh mihemte lah-a Pathen lima hung phondoh hetchetna aneija asehi hitoh nangman Christa nahetna le natahsan dan vekah inlang “Christa hi keima a dinga tonsot Pathen le eihuhhingpu ahi” ti tahsannin lang, chule atahsansa nahikhah tah-a ahijong le kalsonbe nan neitan.

THUDOH:

1. Thu kiti hi Greek paova ipi kitia chule hiche thu hi itih-a anaum pan hitam?

2. Thilsem ho hi iti hung kissemma ham?
3. John Baptist chu ipi hettohsah dinga, chule koiya konna hin kisol ham?
4. Jesu tahsaphe ahung kiso vanga alhaso lou chu ipi ham?
5. Mosi danthu le Christa milungsetna seikhennin.

SIMMUN-4

THUPI: JOHN BAPTIST IN JESU THUDOL AHETTOHSAH

Bible Simmun: John 1:19-34

Thulu: Chule keiman kamua, Ama hi Pathen Chapa ahi tia kahettohsah ahitai, ati(**John 1:34**).

Thumakai

Tunia simmun John bung 1:19-34 sunga hi John Baptist in ama Jesu Christa sanga tahsa lamma peng masa ahijeng vanga, kineosah na neitah-a Jesu Pathen chapa ahia ama hiche chapa chung chang thu miho masanga ahettohsah ahidan imudiu ahi.

I. Hettohsahna masa (1:19-28)

Chang 19,20 “John thu hettohsah hiche ahi” Hichea John kitipa hi lekhabu sunpa hi ahipon lekhabu sunpa John’ in Elizabeth Mary nulamnu le Zachariah chapa John Baptist thu aseina ahi. John Baptist hi ahungpen masanga patna anu Elizabeth chung a thil kidang soh ahitan ahi. Ama ahung khanlet phatnin kidang tah-in Pathennin ahin mang chan masanglai Thulhunlui laija themgao ho bangin mihon alungu aheithe nadin Judah gamthip sunga “Nalung heijun vangam anaitai” tin asam len, alunghei chan chu twi alutsah (baptize) achansah in (Matt. 3:1-12, Lk. 3:1-20) Jesu

Christa jeng jong John ama khutna twi analutnin ahi (Matt. 3:1-17; Lk. 3:1-20)

Hichan geija aminthan tah jeh chun Judah hon amaho lah-a mithupi ho tichu; thempu ho le danthu themho chun John Baptist henga mi asol uva koi ahi agadoh sah u ahi.

II. Koi nahim tia adoh u John'in adonbut (1:20-24)

Judah ten tahsan umtah a John henga ahinsol houchun thudoh thum aneijun; khatna-a “Christa nahim? nina-a Elijah nahim? chule thumna-a themgao chu nahim?” atiuvin ahile, aman “kahipoi” tin adonbutnin ahi. Chutia John'in athudoh hou jouseu kahipoi tia adonbut jeng vangin ahenga hungho chun “eihin sol teu kadonbut theina diuvin” tin adong khoh tennun ahile, John'in adonbutnin, “Pakai lampi sem jangun tia gamthipma khosam” Isaiah themgaovin ase chu kahi atin ahi (Is. 40:3).

Chunga houvaipo loi hon ahung thudoh dannu hi phatah-a ivetle Judah ten Thulhunlui laija themgao anaumsa ahung kit dinga kisei Elizah le Mosi hitei tei jinte tia ginchat na aneiju hidin tahsan aumme (Matt. 11:14; Mk. 9:5). Ajeh chu Elijah ahinga van kalla chule Mosi along kiholmo

III. John Baptist kineosah (1:25-28)

Chutia Jesun adoh hou jouse kahipoi tia aseijouva anatoh dan adoh kit dannu hi ivetle houlamkai ho vang hi lungkham lneh jeng ahitaovin ahi. Ajeh chu hitobanga mi minthang hi Israel ten amukhah lou nao kum sotpi anache ahitan ahi.

John'in twija baptize achansah hi lungheina ding bou ahin lhagao sochatna ding vang chu anahipon ahi. John Baptist'in “keiman twija baptize kachansah ji ahin, hinla nalah uva nahetlouve mikhat adinge” ati hin koima dang ase ahipon aman ahettosah a alampi asempeh pa Jesu Christa aseina ahin ahi. John'in ahettosah pa “Jesu Christa kengchot khao sutlham hoi kahipoi” tia aseijenghi ivetle, John ama jeng jong chubanga mihon pin juija ama nunga hungpa kengchot khao sutlham hoi kahipoi

atihin ama kineosahna avetsah ahin, chubanna Jesu Christa vannoti huhhingpu chu mipi ho chun sangthei teileu tia adeisah jeh-a hitia hi Jesu aphonдох ahi.

Hiche thilso namun hi Authorised (KJV) version nin “Bethabara” ahi atin, translation dang phabep min vang Bethany tin aledoh un ahi. “Bethabara” kiti hi “Gal kul sung” tina ahin Jordan vadung solam sanga um mun thupi tah khat ahi.

III. John’in Jesu Pathen chapa ahi ahettohsah (29-34)

1:29 “Ajingin ahenga Jesu ahung amun,” hichea “ajingin” kitihin avetsah hi houlamkai hon John Baptist ahung kimupiu ajing nikho chu ahi. Hiche nikhoa jonghi John Baptist hi mitampin ajui jing teidiu hi tahsan umtah ahi. Hitia aumlaitah-un Jesu chu galla agahmu hiteijintin, hichun aman “veuvin Pathen Kelngoinou vannoti chonset pomang pa khu,” atin ahi.

Hichea Jesu aphonдохna le aminvona thucheng “Kelngoinou” vin avetsah chu, masanglaija Thempu hon chonset thoidamna dinga ganlhaina-a anaman jiu-banga Jesu michonse ho dinga ahung kipeh doh ding vetchepna kisei ahi (1 Peter 1:19). John Baptist’in “Vannoti chonset pomang pa” tia aminvo Jesu Christa hi, mipiho chun angaisanguva akisan thei teina diuva “veuvin” kiti thucheng hi khoutah-a aman ahi.

Chang 30-31 sunga hin John’in “keima masang peh-a umsa kahitai” atin ahi. Hiche hin avetsah chu ahile tahsa pendolla Jesu sanga John Baptist aping masa ahin, hinla Jesu Pathen ahina leisetna ahungpen masanga Pathen ahina thu John’in eimuchet sah theijun ahi. John’in hiche Pathen chapa Baptize chansah dinga hung kahibouve ati. Chang 32-34 ivetleh Jesu Pathen ahina John’in ahilchet kicheh tah’in akimun ahi. John chun Jordan luija Jesu twi alutsah ahin, hiche a chu vanna kona lhagao vakhu banga ahung lenlhah-a Jesu chung aum den chu akimun, hiche thilsoh jouse hi John’in kicheh tah-a amutah jeh-a Pathen chap among mong ahi tihi hettosahna anei ahi.

Thuchaina

John Baptist hiche phat laiija minche tah, anungjui mihem chujatpi ana nei pa chun, Jesu Christa Pathen kelngoinou, Pathen chapa, vannoi chonset pomang pa mong mong ahi ti ahet chetna banna kineosah tah-a midang ho henga ahettosah bangin, nitin hinkho iman naovin kineosahna nei pummin Jesu-a huhhing na dihtah aumme ti tahsan loulai ho henga ikam paovu leh ichon naovin Jesu hettosah in pangjom jing tao hite.

THUDOH:

1. John Baptist in ahenga hungo chu iti anadonbut em?
2. John Baptist in miho twija Baptize achansah thudol seijin.
3. John Baptist Jesu kengchot khao sutlham dinga kilom akisah lou chu ipijeh hinte nati em?
4. Bethabara kiti hi ipi kiseina hija chuleh hoilai munna um ham?
5. Pathen kelngoinou tia Jesu kiminvona ajeh ipi hinte nati em?

SIMMUN – 5

THUPI: JESU SEIJUI MASA HO

Bible Simmun: John 1:35–51

Thulu: Chuin aman ajah-a, Tahbeh-a kaseipeh nahi, tunungle van akihona, Mihem Chapa chungu Pathen vantil ho akumsuh akaltou namu ding ahi, ati(**John 1:51**).

Thumakai

Pakai Jesu Christa John Baptist khutna baptize achan jouvin anatoch apantan ahi. Jesun alhangpin seijui somleni (12) aneijin, hiche seijuiho chu abang sopicha, abang mun chom chomma hungkon ahiuve. Gaospel dangho Matthew, Mark chule Luke hon jong Jesu seijuiho chu ama ama hetdol cheh-a asutlut banguvin hiche Gospel John'in jong ama mudan le hetdannin seijui masaho phabep chu noiya ho banga hi asutlut ahi.

I.Peter te sopichan Jesu nung ajuilhon (1:35-45)

1:35 “Ajing nikhon” atihin animasa nikhoa John Baptist in miho henga Jesu aphondoh jou ahiding tahsan ahi. Hiche nikhoa thilsoh chu thilkidang tah ahi. Ijeh inem itile anakiseisa banga John hi Pakai Jesu sanga jong minche (popular) masa ahin, seijui jong ananei ahitan ahi. Hiche aseijui ho lah-a mini henga chu Jesu aphondoh ahitai.

1:36 na-a, veuvin Pathen kelngoinou khu! Jesu ahung vale chu John Baptist chun agah galmun aseijui teni henga chu Pathen kelngoinou tia aphondoh ahi. John'in Jesu “kelngoinou” tia aminvo hin masang laiya thempu hon kelngoi thisanna miho

chonset anasop theng jiu chu alungmitna amutoh lhonna hiche sanga loupi jo-a nikhat tengle Jesu Christan athisanna namtin vaipi achoh doh ding ahidan vatkah-a asej ahi. Hiche tilou jong hin angai monga Jesu Christa kelngoinou, gancha lah-a jong phapentah anou jong hikit chutoh Jesu nolna bei ahidan jong atekah ahi.

Chutia John'in asejui teni henga aphondoh chun seijui tenin jong thupha louvin ajuj pai jeng lhon tan ahi. John seijui tenin Jesu nung ajuilhon chun amasa pennin Jesun "Ipi nahol lhon ham?" atin hichun amanin, Rabbi hoija naum jim tin Jesu chu thu aledoh kit lhontan ahi. **Rabbi** kiti thucheng hi Hebrai pao ahin, Greek paovin **didaskalos** akitin, hichu seijuiho ahiloule simlai hon alamkaipu ahiloule ajilkungpu jana neitah-a kouna anaman jiu ahin, eihon "houhil" itiuvn ahi.

Chutia seijui tenin Houhil hoija naum jim tia adoh lhon chun, Jesun "hung lhonnin hungve lhontan" atin, hibang chun amanin jong Jesu umna chu agamu lhontai. Seijuite nin amu lhon phat chu nidan 10 don ahi akitin, tulai phat simmin nilhah lam nidan gup (6 pm) hinte tin hetgilna neihon aseijun ahi.

Thilsoh umchan ho avetleh seijui khat jopa Andrew jong chun kidang asan asopipa Simon hengah "Messiah kamutaove" agatin ahi. "Messiah" kiti hi Hebrai pao ahin, Greek paova ileloh le **Christos** ahi, hichu "thao kinupa" ahiloule "thaonusa pa" tina ahi.

Chunga kisei seijui ni lah-a khatpa Andrew, asopipa Simon henga Messiah phongdoh pa chula akicheh tan, seijui khatpa amin umloupa hi koi hitantem tihi John Gospel sung hetgilna neihon geldan chom chom aneijun, hiche ho lah-a tahsan umpen chu hiche John Gospel sunga ngailut John Zebedee chapa ahiding tahsan ahi (MK. 1:19).

1:42 "Jona chapa Simon nahi, Cepha nahisah ding ahi" Andrew in asopipa Simon Jesu henga ahipui chun Jesun Simon chu ave changmellin ahile amihina le ahansan dan jong chu

ahetdoh hintin minthah khat “Cepha nakisah ding ahi” ati. *Cepha* kiti hi Aramic pao ahin, Greek pao *Petros* a konna kiladoh ahin eihon Peter itiuvin ahi.

II. Jesun Philip le Nathanael akou (1:43-51)

“Ajingin” atihin John Baptist in asijuiteni Jesu nung ajuisah nikho kichai jouni chu ahin, hiche nikho hin Jesu Galilee gam lamma achegon alamjot laijin Jesun Philip amun “nejuijin” ati. “Philip” kiti min hi Greek te min ahi. Amahi Andrew le Peter toh Bethsaida kho munna cheng gel ahiuvin ahi. Philip jong hin Jesu chu miho komma phondoh ding hi athanopna lam ahijeh in Nathanael henga chun “Nazareth Jesu Joseph chapa kamutaove” atin ahile, Nathanael’in adonbut loichellin “Nazareth khoa thilpha hungkondoh ngaijem” tin adonbut nin ahi. Nathanael gella chu Messiah chu khopilen Jerusalem beh-a hung pengleh ti hiding ahin, Nazareth kho neocha khatna konna Messiah ahung kondoh chu adatmo hiding ahi.

Chutia Nathanael in kamcheng ngeilou tah-a Philip adonbut jeng vang chun Philip chun ngaikham geh in “hungin lang hung vetan” ati. Hiche jou chun Jesun Nathanael chu amun ahina ahedoh in pachatna sangtah “phatthemna neilouhelpa” hina (title) apetan ahi. Jesun Nathanael kisinsah dan abonna aseidoh phatnin Nathanael in “Pathen Chapa, Israel te lengpa nahi” ati tan ahi. Hitia Nathanael tahsan danchu Jesun ahetna amu phatnin atahsan hatbe chehna dingin “tu nungle van akihonna Pathen vantil teho akumsuh akaltou achunga mihem chapa namu ding ahi” atipeh e.

Jesu ama le ama “Mihem Chapa” tia akiminvu hin Pa a konna ahunga mihemma ahungpen atah lah toh lhonnin Bethel’a Jacob’in Pakai vantil te akumsuh akaltovu (Gen. 28:12) amu banga nikhatle Nathanael’in jong aloupina amuding ahetsah ahi.

Thuchaina

John Baptist in Jesu Christa kicheh tah a amu a ama seijui teni jeng jong Jesu nung ajuisah toh lhonna amanin jong midangho

komma lungopkaina beija banneicha aphondoh lhonna chule Simon Peter, Philip chule Nathanael tehon jong kicheh tah-a Jesu ahin tahsan uva akin abol banguva nangman jong Jesu Christa nungjui khat nahina-a midang ho komma Jesu tahsan umtah ahi thudol nahetsah na banna atoh-a napoh doh jing louding ham?

THUDOH:

1. Jesu Pathen kelngoinou ahi tihi iti lampanga nahilchet ding ham?
2. Rabbi kiti thucheng hi koipao hija chule ipi kiseina ham?
3. John Baptist seijui Jesu nungjui teni chu koile koi hinte nati em?
4. Ipijeh a Nathanael'in Nazareth kho-a konna thilpha kondoh ngaijem ati hintem?
5. Nathanael'in Jesu chu koi nahi ati em?

SIMMUN – 6

THUPI: JESU THILKIDANG BOL MASAH PEN

Bible Simmun: John 2:1–12

Thulu: Jesu'n hiche melchihna kidang chu Galilee gama Cana kho-a abolpat ahin, aloupina aphongdoh tan; chule aseijuihon atahsan taove(**John 2:11**).

Thumakai

Pakai Jesu Christan thilkidang abol Gospel dangho-a tampi kimujongle hiche Gospel John sunga thil kidang abolna amasapen chu hiche Cana khoa moupui golvahna-a twisih lengpitwi asosah hi ahi. Hiche-a Jesun thilkidang abolhi Synoptic Gospel (Matthew, Mark, Luke) ho a akimuloujeh in atumbek in Bible themhon gelsangna aneijun hiche ho chu bannei chan veo hite.

I. Moupui Golvahna-a Jesu le aseijui ho kikou (1-2)

2:1 “Anithum nin,” atihia Jesu Christan Philip leh Nathanael akoujou nithum ni ahiding tahsan ahi. Hiche nikho-a hi Cana khoa moupui golvah uma ahi. “Cana” kho hi Galilee gam sunga um ahina bannin Nazareth khokom cha ahi. Hiche munna hi kichenna loupitah khat ana umma hia chu Jesu leh aseijui ho jong kouna ananei nabannuva Jesu nu jong jao ahi. Moupui golvah thudol hi alhangpi'n akhang dungjui leh amite chonna dannin kibahna umjong leh tulai eiho mantoh jat chomna seikhen thei phabep aumin ahi. Hiche lai khang chondan hethem ho chun, Jews nungah thengkhath chu Wednesday (vahchan ni) nikhoa bou

anajineisah jiuva hitoh lhonna jan khangkim langtah le mipi hon thaomei adetvah uva thanom tah-a anapuile jiuva achaina tengle bou ajiding pa chutoh akichensah jiu ahi. Akichen jou lhon nikho phabep sunga mounu le moulang pa chu lengpa le lengnu tobanga anajen jiu ahi.

Hitobang mipi thanop nale kipana a chu Jesu le aseijui ho jong kou anahiuva, chule Jesu nu jong nasatah-a analunggim ahi. Lekhabu dang khatna chun hiche-a moulangpa nu hitoh Jesu nu hi sopi ahilhonne akitin, ahitah beh leh akisa lunggim ding mong chu ahi.

II. Lengpitwi lhahsam (2:3,4)

Golvahna dia hung kikhom chutoh don ding agon uchu kitohlou himaijin tin lengpitwi chu ahungbei tan ahileh Jesu nu chun ana hepaijin hichun Jesu henga “Lengpitwi aneitapouve” ati. Hichun Jesun adonbutnin “numei eini i-ikin tah ham” atin ahi. Hiche-a Jesun tahsa lamma apenna anu “Numei” Greek paova *gunai* ati jenghin Bible them ho lunghtim anasuboi lneh in ahi. Hinla thu sutoh them ho chun hiche’a Jesun anu “numei” atijeng hi numei ahi jeh-a noise nale thildang jeh ahipon, amavang hichelai miho chun jana neitah le ngailutna nei tah-a anaman jiu ahi. Akihetchetbe na chu cross a akikhai pet jong chun anu chu numei ati kitnin ahi. Hitia anun Jesu ano jeng vang chun Jesu athuphan “kaphat ahijep hih laiye” ati. Hiche-a Jesun “kaphat hijep loulai” ati hin geldan tampi umjong leh Messiah ahina a anatoh phat ahiloule akiphondoh phat vatjep hinalai ahi ding tahsan aummin ahi. Chutia Jesun “keima phat ahijep hih laiye” ati vangin anu chun abolthei ding chu tahsanna aneijeh in lhacha ho thu apen songbel lentah tah gup chu gotsan akoijun hia chun Jesun lhacha ho twi sungdim dingin thu apen ahileh, athupeh bang chun bel sunga chun twi asung dim taovin, hichun lhacha ho acheova bel sunga twi chu athal uva golvah vaihomba gavet sah dingin asollin hibang chun amaho jong acheovin ahile, vaihompan jong atepkhah phat chun adatmo lneh in ahi, ijeh inem itile chonna ngai dolla chu

amasa penna chu lengpitwi chih kidon masa jia chule adao jep chu kidon nunungji ahi. Hiche-a mudoh thei chu lhacha ho khuttham lengpitwi sangin Jesun twisih lengpitwi asosah chu gamchenga atwijoh akimun ahi.

Thubul lamma kisei bangin John Gospel sunga Jesu thilkidang bol masapen ahitoh lhonnin a Pathen hina aphongdoh'in seijui ho le mipi ho chun Jesu chu atahsan taovin ahi. Hitia thil kidang abol jou chun Jesu anu chule aseijuiho toh Capernaum lamma achesuh taove.

Thuchaina

Jesun datmo umtah thilkidang twisih lengpitwi asosah hi phatah-a ivetle ama thanop man le minche ding deina a abol ahipon, amavang anu Mary chun ajol le a chua Jesun lhacha ho atohdiu dol atohsah-a twisih chu lengpitwi hungsoh ahibouvin ahi. Hiche banga hi nangman jong Pakaijin bollin tia nanganse chu bol jengle chun thilkidang hungsoh intin hia chu Pathen loupi ding ahitai.

THUDOH:

1. Cana kho hi hoilai hija ipi kin ana um ham?
2. Jews ho moupui dan chomchan seijin.
3. Moupui golvahna a chu koi koi kouna anachang hiuven?
4. Jesun anu "numei" tia akou jenghi ipi lunggel naneijem?
5. Jesun Cana khoa twisih lengpitwi asosah chun ipi aphondoh a chule koihon atahsan tah uven?

SIMMUN – 7

THUPI: JESUN JERUSALEM HOU IN ASUH THENG

Bible Simmun: John 2:13-25

Thulu: Chuin vapal johho jah-a chun, Hite hohi hia konin podoh-un; Ka Pa in hi sumkolveina in nin bol hih-un, ati (**John 2:16**).

Thumakai

John Gospel sunpa hin Jesun houin asuhtheng thu hi alekhabu bullama hi akoijin, bung 12:12 lam khun Jerusalem alut akimmun ahi. John'in asut toh kibang lou hellin Gospel dang thum hon lekhabu chaina lammin asunlutnun ahi. (Matt. 21:12-13; Mk. 11:15-16; Lk. 19:45-46). Hichea kimudoh ding phabep ho chu; "Kalchuh kut" laitah-a mihon houin sung alam louva amanchah uva konna Jesun alunghanna avetsah a chujouva mihon ahin tahsannu hi ahi.

I. Jesun thiljoh ho alecheh (13-18)

2:13 Kalchuh kut, angai dolla Judah ten "kalchuh kut" (passover) hi Egypt lengpa khutnoija konna Pathennin ahin huhdoh nao nikho geldoh jingna a kumseh a anabol jingo ahi (Ex. 12:14-20, 43-49; Deut. 16:1-8). Hiche kut chu ahungnai tan ahile Jesu jong hiche kut na ding chun Jerusalem'a achetou tan ahile Jerusalem hou inn sunga bong, kelngoi chule vapal joh ho, chule sum lheng ho agamun, hichun Jesu alunghang lneh tan ahi. Hiche a gancha joh ho le sumlheng ho hin alhangpin khopi sung chun anakivang vei jong leu nidanga sanga atamjoh diu tahsan aummin ahi, ijeh inem itile kut loupe tah kimang ding ahijeh-a thilcho ding jong mi tam tei ding ahi.

Hichan geija dandih loutah-a sumlepai holna-a houin asuhboh uchun Jesu alunghan sah in athiljoh hou le asumlhetna hou chu athechep in “kapa in hi sumkolveina innin bolhah-un” atitan ahi.

Chuti tah-a Jesu alunghanna thilkeu ho alechep jeng chu aseijui hon amuvin Psalms 69:9 na kisei “na inna katom pannin eine chajje” kiti thu ageldoh taovin ahi. Hiche hin avetsah chu midih chu Pakai houin dinga tomngai tah-a apan chu achaina thina ahidan ahi. Hiche laiia Judah ho chun alhangpia “melchihna” (ICor.1:22) anahol utoh lhonnin Jesu hengah “nathilbol hi” amelchihna ipi ham? Neimusah un atiu ahi.

II. Jesun Ama tahsa le houin atekah (19-21)

Judah ten chutia melchihna ahol dan hou Jesun ahethatnin “Houin hi suchim’un, keiman nithum’in tungdoh inge” ati (:19). Chutia Jesun amaho gellou lampeh thu aseiphath chun Judah ho chun “kum 46 jen lutna kisa nangman nithumma natundoh ding ong” atiuve (2:20)

Jesun ama athia nithum nia athodoh ding aseichu Judah hon hiche phath laiia houin anaum Herod lengpan 20 ahilou leh 19 BC laiia Solomon lengpan anasah houin, galmi hon asuh chim jou uva anasah phath kit, houin nina (Second temple) kum 46 vel lutna ana kisa nangman iti nithum sunga tundoh ding nagot ham tia ana taipongu ahi.

III. Seijui hon Jesu atahsannu (2:22)

Hiche chang 22 sunghi phatah-a ivetle seijui hon Jesu leisetna analen laiia Pathen hina ana tahsan beh lou dannu John hin aseijin hijong anahin ahi. Ijeh inem itile Jesu chu athilah-a konna kaithouva aum phathna chu seijui hon Jesu toh alen khom laijuva aseichu anung geldoh kit nuva, hitoh lhonna Isaiah 52:12-53:12 a themgao pan anasei chutoh asuhto uleh ahin tahsan bep dannu John hin ahetchet jeh-a hi aseichu ahi.

IV. Judah hon atahsannu Jesun alung opkai pi (2:23)

Chunga kisei banga kalchuh kut hi Jerusalem'a ana um ahin hiche kut sunga chu Jesun "melchihna" a konna hintahsan ho chu angampi pon ahi. Ijeh inem itileh aman mijouse ahetsoh ahi. Jesu hi leiset mihem hina neijong leh Pathen hina lhingset nei ahijeh in miho lunghtim sunggil chu aboncha ahetsoh kei ahin, hijeh-a chu "melchihna" abolmai maija atahsan nao atuh chah diu chu Jesun atahsan louhel ahi.

Hiche goh hilouvin melchihna abol jeh-a tahsan mai mai hon ama ahet tohsah diu chu Jesun aphant sah pon ahi. Ijeh inem itile mihem te lungput chu aboncha ahetchet ahi.

Thuchaina

Jesun Jerusalem'a kalchuh kut kiman sunga houin sunga sumkolveiho ana no cheh keu hilouvin, melchihna tampi abol akimun, hinla hiche melchihna abolla konna mihon ama atahsan diu chu Jesun ana tahsan pon ahi.

Sopi nangma jong natahsa "Pathen intheng" (I Cor 3:16) hi aneipa Pathen dei banga namanchah-a chule nahin pi-a aheloulai le aneiloulai ho nahet them sah dinghi Pakai dei ahi.

THUODOH:

1. Kalchuh kut hi ipi hija chule hoilai munna anaman uvem?
2. Jesun ka-pa in hi ipin mang hih un atim?
3. Jesun houin nithumma katundoh ding atihi ipi aseina hija chule hiche houin chu koijin itih phat laija anasah hin tem?
4. Jesun ipi abolla konna hin tahsan ho chu angampi lou hija chuleh ajeh ipi ham?
5. Katahsa Pathen intheng hi aneipa dei bangin mang jinging kate nati nah em?

SIMMUN – 8

THUPI: JESU LEH NICODEMUS KIHOU LIM

Bible Simmun: John 3:1-21

Thulu: Ajeh chu Pathen'in hibanga hi vannoti angailut jeh-in, Achapa changkhat chu apetan ahi; koi hijongle Ama tahsan chan chun mangthah louva tonsot hinkemlou anei ahitai (**John 3:16**).

Thumakai

“Pathen toh kivop louvan melchihna kidang nabol chengse hi koiman aboltheipoi,” tia jankhang laiija Nicodemus in Jesu henga ahung seija konhin Jesu Cana khoa melchihna kidang abol goh hilouva mun danga jong tampi abol ahidan atah langin ahi.

Nicodemus hi houvaipo leh mithupi tah ahijeng vangin huhhingna thudol hetnomna aneiho Jesu ahung dongin hitoh lhon chun Jesun jong kicheh tah'in ahilchennin ahi. Hiche kihoulimna a konna hin mihem tamtah in huhhingna dihtah akimun, hiche ho chu ipi pi ham ti bannei chan veu hite.

I. Nicodemus chungchang thu (3:1-2)

Nicodemus hi “Pharisai ho lah-a khat ahi” akiti. Eiho atamjo gellin pharisai itileh “miphahem” dannin imoh geljeng jiuvin ahi. Phatlhem boljong chu umnaovinte, hinla pharisai hohi Judah te lah-a michonpha pentah, danthu phatah-a juiho chu amaho bou anahiuvin ahi. Hitobang ho lah-a Nicodemus jonghi khat ahina bannin “Judah ho vaipo” (Sanhedrin member) jong ahi.

Sanhedrin member ho hin Roman Government thaneina noija gamsung kivai homna hihen chule hou thua kivai homna hijong le Judah te chungu thu ananeiju ahi. Amaho chu upa somsagi ahiuin, aphot dungjuija anakilheng doh jiuva ahi. Michonphatah le Judah te chungu vaibol ahina bannin Nicodemus hi mihaosa tah jong ahi. Ajeh chu aman Jesu athijouvin jong thao namtui Ser somnga ahin choijin Jesu long chu ahung nu ahi (John 19:39)

Hitobanga chonpha, vaipo chule mihaosapa janna Jesu henga ahung hi lungdon umtah khat chu ahi. Hetgilna neiho lunggellin jan khel khella Jesu henga ache hin Judah mipite akichat hinte atiuvin ahi. Ajeh chu Nicodemus amatah jeng jong Judah hou lamkai hija sunnin kiche leh Judah hon ei oimou vinte ati hinte atiuvin ahi.

Nicodemus chun ja-na neitah-in Jesu chu **Rabbi** (houhil) tin agakouvin, hitoh lhon chun Jesun melchihna abolho jouse aphotdoh'in ahi. Jesun Pathen hina anei ahijeh chun Nicodemus lunggelho jouse ahet ahin, hitoh lhonna chu Jesun adonbut pajeng ahi.

II. Chungu konna thah pen (3:3-13)

3:3 “Chungu konna thah pen kitlou chu koiman Pathen gam amutheipoi.” Nicodemus tahsa thu hihen houthu hijong leh mithupi tah khat ahijeng vanga chungu konna athah pen kitlou chu Jesun ahetna, hitia hi nathah pen kit ding ahi tia aseipeh ahi. Chutia Jesun lhagao thudol aseipeh chu Nicodemus in tahsa thun alan “mi ateh nung teng iti thah pen kitthei ding ham?” tin thudoh anei bepmin, hinla Jesun alhagao hinkho kikhel ding thu aseina ahin ahi.

3:5, Twi le lhagao, Pathen gam luttheina dinga chu “twi leh lhagaova” pen angaitan ahi. “Twi peng” thudol hi geldan jat chom chom umho lah-a chithum noija banghin veu hite:

Khatna-a chun mihem te angai dolla ama oisunga twisih a ahung kijilla ahung pen dan kiseina ahi tiloi aum'in,

Nina-a Pathen gam lut theina dinga Baptize achan tei angaije atiuvin ahi.

Achainan, Bible'in "Twi" hi alhangpin thilboh sopthengnan amangin ahi. Hiche banga hi mihem te Pathen kom aluttheina diuva chu Pathen'in ahinsol achapa Jesu chu chonset sopthengna dinga ahinsol ahi. Hiche ahinsol achapa tahsan chan chu angimsa ahitan ahi (John 15:3).

Mihem khat chun Christa atahsanna akisan jouteng chuleh alung sunga lhagaoheng hung cheng ding hichun Christa toh akimuto chan geija dinga thahatna apah ding ahitai. Twi leh lhagaova pending aseigoh hilouvin "tahsa le lhagaova konna pending" thu jong asej kitnin ahi. Tahsa a konna ati hin, mihem tahsa vou hin Pathen gam alothei lou ding hiche leisetna hi kichai ding ahin, amavang lhagaova konna peng vang chun tonsotna Pakaija ahi aphotchen ahi.

Chunga konna thahpen kit ding dan tampi Jesun asej vangin Nicodemus chun ahethi deh pon, hichun Jesun apa-a konna amu chule ahet asej Nicodemus in asan nomlou chu phamo asa lseh in ahi. Hijeh chun Jesu ama jong vanna konna hungkumlha ahidan jong Nicodemus henga aseidoh in ahi.

III. Jesu tahsan ho them achannu (3:14-21)

Mi tamtah-in Jesu Cross a akikhetbeh leh athia athodoh jouva hibou sochatna um dannin agellin ahi. Hichu hilouvin Jesu ama leisetna alenlai jenga jong ama tahsan ho chu them changa anaum ahitaove.

Pathen chun vannoi hi angailui atin, ipijeh-a angailut ham itile chonsetna ithi tah ding jeh uva chu ahi. Hiche laitah a chu Pathen'in achapa chu eiho eina peh-u ahitan, hiche athil mohpeh chu tahsanna kisan hon hinna aneidiu chule akisan lou ho chu themmo change um ahitaove.

Thuchaina

Judah te dinga Nicodemus kal valla thupi ding ana umbhseh talou pa chu, jankhang laiija kineosah tah-a Jesu henga galutna Jesun huhhingna thu phatah-a aseipeh-a khonunga Jesu long nasatah-a ajen hin Jesu atahsan le angailut dan aphochennin ahi. Hiche banga hi nangman jong kineosah tah-a tonsot lenggam thu hi naholla, hinna a naneija chule najokham tah-a ana natoh ding hi Pathen'in adei pentah chu ahi.

THUDOH:

1. Nicodemus hi itobang mi ham?
2. Sanhedrin member ho chu mi ijat hiuva chule ipi lam panga mopo hiuvem?
3. Nicodemus jan khel khella Jesu henga ache hi itobang lunggel umminte nati em?
4. Jesun Nicodemus jah-a twija apen loule ati thucheng hi miho geldan ipipi umem?
5. Pathen thilmohpeh Jesu Christa hi iti kisan ding ham?

SIMMUN – 9

THUPI: JESU CHUNGCHANG THU JOHN BAPTIST IN AHETTOH SAH

Bible Simmun: John 3:22-36

Thulu: Chapa tahsana chun tonsot hinna anei ahitai; Chapa tahsanlou vang chun hinna mulou ding; amavang Pathen lunghan achunga umjo ahitai, ati (**John 3:36**).

Thumakai

Simmun masa lam chun John Baptist in kineosah tah-a Jesu anaphondoh-a, ama seijuiho jeng jong Jesu nung anajuisah imu taovin ahi. John Baptist in Jesu ahetchet banga hechen dinghi hiche lai khanga chu mi umlou maithei jong ahi. Tunia simmunna jong hin kicheh tah'in Jesu Pathen'a konna hung ahijeh-a akhan tou tou ding chule, ama (John) vang anemsuh suh ding thu aseina banna miho Jesu tahsan jeng dinga atemna imudiu ahi.

I. John Baptist henga mipi ahung (3:22-26)

Hiche lai phatna hi Jesu Christa jong aseijuite toh gamtinna cheuva na tampi atoh u ahitan ahi. Hitia Baptize jong achansah jinglai hin ama (Jesu) anahet tohsah pa John Baptist injong *Ainon* khoa chun mipi tampi Baptize ana chansah kitnin ahi. *Ainon* ahiloule *Aenon*, John Baptist in baptize anabolna mun hi kicheh tah-in kihe hih jong le Galilee twipi le twipi thi (Dead Sea) kikh hidingin tahsan ahin, hiche munna hi twi tampi umma ahi.

Hiche thilso chan geija hi John chu songkul lutlou lai ahi tin hiche Gospel John hin aseijin ahi. Hiche lai phat tah, John'in mi tampi twi alutsah jing pet chun kisuh theng thudolla lunggel kibah louna alah uva ahung soh doh tan ahi. Hichea gelding khat chu, ipijeh pentah-a John seijuiho leh Judah ho kinel hitaovin tem tihi hetchet hahsa lneh jong le hiche thudolla hetgilna nei atamjo gel dannin, John Baptist seijui ho hin Jesu twilutsah sanga John twilutsah hi dihjo asah dan'un akilange, alangkhatna Judah mi adangho John seijuiho ho toh kinel ho chun Jesu twilutsah chu adihzah joh uhinte tihi ahi. Ijeh inem itile John amatah jeng jong chun Jesu ama sanga chungnungjo ahidan anaseisa ahitan, hiche toh lhonna hi Jesu henga mi tampi jong hung ahitah ding tahsan ahi (3:26).

II. Jesu chungnun joh dan John'in ahettosah (3:27-34)

John seijui hon lungphamo thim tah-a alamkai pu'u John Baptist henga thu ahunglutnu donbutnan Jesu chungnun dan John'in aseijuiho henga kicheh tah'in anaseidoh in ahi. John'in Jesu ahetchet danhi Jesun thilbol theina anei jouse jong hi vanna konna kipe ahidan aseijin ahi. Hiche goh hilouvin, John'in ama seijuite henga "Keima Christa kahipo" tijong anaseidoh-a chule aseijui hon jong ana tahsan sao ahitah toh lhonna Christa lampi semtoh dinga hung kisol masa ahidan jong aseijin ahi.

Jesu chungnun joh dan hiche lai khanga Jews te kichen thudolla konnin jong John'in hilchetna apen, ama (John) hi ajineipa golpa agolpan ji anei phatna hapa kipah'in akiseijin ahi. Hiche hin avetsah chu Jesun nungjui tampi ahinneija melchihna tampi aboldoh ho-a konna hi John amatah hi nasatah-a kipah a chule akipana hi chamkim ahitai.

3:30, "Ama khang touva keima nemsuh ding," tia John amatah Jesu toh akitena dan hi ivetleh John hi leija kon, nikhat leh leivuija akile kit ding avetsah ahin, "Jesu vang chu khangtou cheh cheh ding ahi," Ijeh inem itileh Jesu chu "van'a konna hung ahijeh" ahi.

Hiche a “chung le noi” tia kimang paocheng hi Scholars hon “dualistic language” atiuvin, hichu lampi nia chekhen pao, akibahna umlou, vetsahna dangho; muthim leh khovah, chonset le chonphat, thina le hinna chule adang dang. Hiche tobang golla hi John’in Jesu toh ama akibah loudan aseih ahi. Hichan geija John’in adopsang, chung a konna hung Pathen chapa tahsan chun tonsot hinkemlou anei ahitai” atin “atahsan lou vang chun hinna amu lou ding ahi” atin ahi. Chung a pao kikhen dan kisei bang bangin hia jong hin “tahsan le tahsan lou” (belief and unbelief) akiseikitnin, hiche hi mihem ten akilhen ding joh ahitan, chung a konna hung chungnung pen pa chu natahsan ding ham? Natahsan lou ding ham natahsan lou leh “Pathen lunghan nachunga um ding” Pathen hi akhoh jeh-a alunghang ding hilouvin, aphantna amite huhdohna dinga thilpha abol amiten asan nom tahlou jeh-a lunghan ding ahin, hiche alunghanna chu ama tahsan louho chung a konna chu koiman alahdoh thei tah lou ding ahi.

Thuchaina

John Baptist in Jesu Messiah ahi tia aphondu na banna chung a kon ahidan leh ahung khan tou tou ding kicheh tah-a amu-a miho henga hettosahna aneija mihon atahsan thei tei nadiuva aseiphong banga nangman jong Jesu chungchang hetchetna neijin lang chule athu hettosah nan hinkho nanei sungin pan nasatah-in lajing tan.

THUDOH:

1. John’in twi alutsahna mun Aion kho hi hoilai mun hinte nati em?
2. John seijui ho leh Judah ho kisuhteng thudolla anakinel nao chu ipi pentah hinte nati em?
3. John’in keima Christa kahipoi ati chu aseijui hon atahsan uvem?

4. John'in Jesu chungthu aseina-a koite kichen dan thu toh atekah-a chule ama (John) dinmun aseiho ipi pi ham?
5. Pathen lunghan otdoh nading kilhen joh ding chu ipi hija chule hiche kilhen ho chu iti diu hitam?

SIMMUN – 10

THUPI: JESUN SAMARIA KHOPIA NA ATOH

Bible Simmun: John 4:41-42

Thulu: Pathen chu Lhagao ahi, chule ahouten lhagaole thutah-a hou ding mong ahi, ati (**John 4:24**).

Thumakai

Solomon lengpa thijouva alenggam kehni Judah lenggam leh Israel lenggam tia ahung kihop khen uchun, alah uva kithet tona nasatah anaum tan ahi. Ahideh in Judah te chun Israel lenggam'a cheng asopi hou chu mai chaan ana the pouvin, ana twi ngol jengun ahi. Hitia kithet tona umjing chu Jesu Christa ahung phatnin nam khentum umlouvin Samaria khopi ajotpaan hiche munna chun thil nasatah abollin, hiche athilbol ho chu ipi pi ham banneichan veu hite.

I. Jesun Judea gam adalhah a Samaria ajotpa (1-6)

Judea gam hi noilam lenggam (Southern Kingdom) ahin, Galilee gamma Jesu ache ding tahjeh-a chu Samaria khopi (Israel lenggam tolpi) chu ajot pa tei ding ahi. Samaria jotpa hi shortcut (lampi achomlam) hija ahi. Shortcut ahijeng vangin Judah te chun hiche Samaria khopi hi anajotpa jilou hellu ahi. Ajeh chu Samaria mite hi Judah te dinga namthenglou hiuva ahi. Akhang akhanga namthenglou tia anathet uva anajot nomlou namun'u chu Jesun ajotpa tan ahi. Ajotpa chun Sukhar/Sychar kho Jacob'in achapa Joseph apehna mun chu alhung tan ahi. Sychar kho hi Ebal molsang leh Gerizim molsang kikhah-a um ahin, hiche munna chu Jacob twikul jong umma ahi. Jesu atha achol jeh chun hiche twikulla chun akicholdo tan ahi. Hichu nilhah lam nidan gup don ahi.

II. Jesu leh Samaria numeinu kihoulim (7-26)

Jesu thachol tah-a Jacob twikulla akicholdo pet chun Samaria numeinu chu twi thallin ahungin, hichu Jesun amun amanu henga chun don ding twi athum tan ahi. Hinla numeinun Jesu chu Judah mi ahi ahen, a-itih a Samaria mi leh Judah mi ana ki anjon louvu chu aseijin, Jesu chu don ding twi afeh nom tapon ahi.

Chutia numeinu athuphat phat chun Jesun, hiche numeinun agelkhoh thei teina ding chun ajah-a thil thum numeinu tongkha thei ding aseijin hiche ho chu;

Khatna-a, Pathen thilpeh ipi ahi ahet ding

Nina-a, Ahenga twidon ding thumma chu koi ahi ahet ding

Thumna-a, Hintwi afeh ding.

Chunga thil thum jeh chun numeinu chun ahin gelkhoh tan, hinla amanun Jesun ipi aseina ahi chu ahedoh pon, twikul apu pao Jacob'in anapeh-u thuh dan chu aseijin iti nathal thei ding ham ati. Atahbeh'in hiche Jacob twikul kiti hi archaeologist (thillui kholgil them) hon Palestine gam sunga twikul thuh pen ahi atiuve.

Jesun numeinu komma twi donding athum numeinun ahet them lou jeh chun, Jesu amanu jah-a “keiman kapeh ding twi vang chu adon jouse dangchah kit talou ding ahi” ati.

Numeinu chun Jesu akisanna tonsot hinna anei ding thu, Pathen thugil Jesun aseipeh chu numei nun tahsa lam twi mong mong dannin agellin “hichanna twi thalla kahung louna dingin hiche twi chu neipen” ati. Chutia hiche thudolla akihou limpet lhon chun Jesun numeinu chu ainneipu gakou dingin asollin, hinla amanun inneipu aneilou dan aseijin ahile Jesun hiche numeinu hina jonthanhoi, aji nitlouva ji avel vella ananei chu aseidoh peh tan ahile, numeinun kidang asan “Pu, nangma hi themgao nahi” atitan ahi

Chutia numeinun themgao ahi tia atahsan jou chun apu apa teo Pathen houdan aseijin ahi (4:20). “Hiche Mol'a hi Pathen ahoujidannu ahi” “hiche Mol'a” kiti hi chungu kisei banga Gerizim

mol ahiding tahsan aummin ahi. Ajeh chu Samaria te chun hiche mol chungu bou chu Pathen anahou jiu ahi. Amaho Pathen houna mun titah louvin, Judah ten Jerusalem'a bou Pathen ahoujiu jong aseijin ahi. Chutia numeinun Jesu henga aseiphat chun Jesun "nanghon nahetlouvu nahouvu ahin, keihon vang kahetnu kahouvu ahi" tin adonnutnin ahi. Hiche hin avetsah chu, Samaria ten Pathen nahoukhel taove tina ahin ahi.

3:22 "Huhhingna chu Judah te lah-a kon bou ahi." Hiche-a hin Jesun Judate jouse sohcha ding ahi atina ahipon, Jesu tahsan louho chu Judate hijongle sohcha deh ding ahipou vin ahi.

Samaria ten Grizim Mol'a chuleh Judah ten Jerusalem'a Pathen ahovu chu Jesu Christa amatah ahung phatnin "Pathen chu lhagao ahin, ahouten lhagao leh thutah-a ahou ding mong ahi" atitan ahi. Abulla Jesun ase "lhagao" ati hin Pathen chu mihemten amitnuva amuhteilou Pathen ahina mun tinna um chu aseina ahi. (Col. 1:15; I Tim. 1:17; Heb. 11:27) chule anina "Ahouten lhagao" atipa vanghi Pathen, mitna mutheilou chungu kiseipa hilouvin, mihem ten ilungthim sunggilluva Christa ikisan naova chu mohou hilouva phatah-a ihinna pumpi, ilungthim pumpi chule thutah-a houding ahidan ase ahi.

Chutia Jesun thugil ahiltah chun numeinun jong apu pao khanglaija patna Messiah hung ding anagaldot dan thu Jesu henga aphonong doh'in ahileh Jesun "nakihoupi hi ama chu ahi" atipeh tan, hichu keima hi Messiah masang peh-a pat nanagaldot jing pao chu kahi atina ahi.

III. Jesun aseijuiho thu ahil (27-38)

Numeinu toh Jesu lunglut tah-a anakihou laitah lhon chun seijui ho chu ahungtao vin ahileh, hiche numeinu chun apet tah chun Jesu chu Messiah ahi ti tahsanna kicheh tah anei ahitah jeh chun atwibel jeng jong dalhah ding khohsa talouvin, adalhan khopi sunga Jesu thu agasei choile tan ahile mipi tampi chu Jesu henga ahung kikhom taovin ahi.

Hiche pettah chun aseijui ten Jesu chu gilkel tei ding ahi ti aheth phatnun “Rabbi, ann nen” atiuvin ahileh Jesun tahsa oiva nadinga seijui hon akhoh sah nao chu aman “lhagao ann” thun adonbutnin, “Eisolpa lunggotlam bolle akin suhbulhit chu keima kin ahi,” atin ahi. Hiche aseih hin leisetna ahinsolpa apa (Pathen) thu mihon aheth teidiu chu tahsa anneh, twidon sanga athupi dan akimun ahi.

Jesun hiche lai khanga agamnei ho thuchih “chang-atna ding lhali aumnalaije nati ji hih um?” tia loubolmi ahinaova angai dolla aseijiu chu Jesun aseijin ahi. Hichea hin tahsa kihinsona dinga anatohna diu phat aumjing dan aphochennin, amavang hichetoh banglou hellin Jesun “khodaovin loujao khu gah veuvin, tun a-at phat ahi, aminnin agusoh tai.” ati. Hitia Jesun aseih phataha ingaito leh leiset hinkho kihinsona dingin vang phat aummin hinla, Pathen lenggam kehletna dingin tutah hi aphahtah chu ahin, tahsan cha khatnin tutua atoh thei petna atoh jing lou le phat akilet ding dan avetsah in ahi.

Jesun “chang-at” thu aseih ahijeh-in “atupa leh a-atpa” thu aseijin ahi. Chang chu mi khatnin atu lousea chu changkung chu pilhinga ga thei lou ahi. Hiche tobang agamnei ho loubol dan toh Pathen thu hi kiseibeh leh hethei tei junte ti ahijeh chun, chungga “atupa” kiti hi, Jesu Christa ama tah kiseina ahin, chule “a-at” atiho hi seijui ho leh adang dang ho aseina ahi. Chutia a-tupa auma a-atpa aumjing vang chun Jesun amani chu “thakhat pan akipah thanom khomji lhonne,” atin ahi, hiche hin avetsah chu mijousen atoh thei dol cheh-a kipah tah leh thanom tah-a Pathen na atoh khom diu avetsah ahi.

IV. Samaria mite lung hei (39-42)

Chunga kisei banga numeinun kicheh tah-a Jesu atahsan natoh-a apohdoh-a hiche thupha agalhangsap jal chun khopi sung chu halna nasatah (great revival) alhung tan, mipi ho chun kicheh tah'in Jesu Christa chu atahsan nun, hiche jal chun mipi ho ngeh

dungjui jin Jesu jong Samaria khopia chun nikho ni anichong tan ahi.

Thuchaina

Pendollin Jesu Christa hi Judah phunga konna peng hijong leh Pathen chapa changkhat set vannoti mitin huhdoh dinga hung ahijeh chun, tahsa lam dolla achonnao Judah te leh Samaria mite kithetto chu Jesun apalkeh in, hiche numeinu henga chun lunglut tah-in Pathen thu ahiltan ahileh hia kon chun amanun ahin tahsannin hiche atahsan chu anatoh in apodoh in ahileh kidang tah-in Pathen lenggam chu amachal lleh jeng tan ahi. Hiche banga hi mihemten kibah louna tamtah ineihou tichu; lhagao mile lhagao milou, aching leh achinglou, athem leh athemlou, ahao leh avai chuleh phungle chang chule adang danga kibah louna ineihou jouseu hi Christa min jalla thengsella ihin gopkhom thei tah tengule hichun Christa lenggam' a dinga ga tampi eisosah diu ahitai.

THUDOH:

1. Judah te le Samaria te chu ibolla kichonto lou hiuva ham?
2. Sukhar/Sychar kho umdan achom lammin seijin.
3. Jesun thucheng thum aseidoh jalla numeinun ahin tahsan chu ipipi ham?
4. Huhhingna chu Judahte lah-a kon bou ahi, kiti hin ipi pentah aseinom hintem?
5. Pathen chu lhagao ahin, ahouten lhagao leh thutah-a ahou ding mong ahi ati hi hilchennin.
6. Atupa leh a-atpa atihi koiho leh koiho kiseina ham?

SIMMUN – 11

THUPI: JESUN MILOUPI PA CHAPA ADAMSAH

Bible Simmun: John 4:43–54

Thulu: Jesu'n ajah-a, Nachena dinga kichetan; nachapa ahinge, ati. Mipa chun ajah-a Jesu thusei ho chu atahsanin achetai (**John 4:50**).

Thumakai

Pakai Jesun thil kidang tapi abol, Gospel dang hon jong aseiju toh lhonnin hiche milupitah pa chapa adamsah jong hi Matthew 8:5-13 leh Luke 7:1-10 a Sepai jalamkai pa sohpa Jesun adamsah hin kibahna neocha khat anei jin ahi. Mi phabepmin jong hijong hithei ahi tin agellun ahi. Hinla athusim chedan phatah-a ivetleh akibah thei louna tapi aummin ahi. Hiche tunia ivet khom diu pa hi John Gospel sunga Jesun thil kidang abol anivei channa ahidan kicheh tah-in akimun, tun hiche miloupi tah pa chapa Jesun iti abol dam ham ti bannei chan veu hite.

I. Jesun Galilee gam ajot (4 : 43 – 46)

(4:43) “Ni ni jou chun ama Galilee lamma achetai”. Bung 4:40 na-a Jesu Samaria miten anichong dia angeh-u Jesun anoppeh-a nini anichon jouva hi Jesun Samaria adalhah-a Galilee gam ajot ahitan ahi. Hiche lai khanga chu Judea gam hi atodop pen ahin, Samaria gam chu achungjep ahin, Galilee gam vanghi achungnung pen anahin, hiche phatna hi Jesun gamlai lung Samaria a konna Galilee gam chu agah jot ahitai.

Jesun Galilee gam ajot lona hi phatah-a ivet leh Jesu hi ama gam (Judea) gam sunga hi tahsan ahi loudan akimun ahi. “Themgao ama gamsunga ja in aumpoi” tia Jesun asehi hi Matthew 13:57; Mark 6:4 a jong kicheh tah-in akimun ahi.

Hibanga minthang bolmo kidang leh melchihna tampi bolpa hi i-atileh amite chun atahsan louvu hintem tihi tulai mitam pin thildang dang toh asuto un vetsahna; hou natong khat chu ama insung mi leh agamsung min itiba atahsan ding ham? Jesu bon amiten tahsan lou tin Pathen thu lamdih louva gella, chujong leh hou lamkai tampi amatah jong chuti’ a kigel aumda pon ahi. Jesu amitebon atahsan louvu toh eiho imiten eitahsan lou dannu hin kibah louna lentah anei jin ahi. Jesu hi leiset mihem min hung peng jong leh Pathen hina pa jalla bolmo kidang abolho chu Judah ten thupi a koilouva tahsa lam pen dolla anu apa ahentu chubou apangputnu ahin ahi. Chutia Jesu chu Messiah ahi ti atahsan thei tahlou-hel jeh uva jong chu achaina a thingpella akhetbeh-u ahitan ahi.

Chutia Jesu ama tah jengin jong amiten atahsan loudan kicheh tah-a aheth ahitah jeh chun ama tahsan ho Galilee gamma che ahitan ahi. Hiche achena mun hi masanga moupui golvahna a anachea twisih lengpitwi ana so sahna mun Cana kho chu ahi. Hiche munna twisih lengpitwi asosah jeh-a atahsan keu goh-u hilouvin, Galilee mite chun bung 2:13-25 sunga Jerusalem’ a kut lai ja Jesun na atoh ho jalla chu nasatah-a atahsan uva kipah tah-a analemnu ahi.

II. Achapa damna dinga Mi lalpa Jesu henga atao (47-50)

Jesu Cana alhung tan ahileh, hiche munna chun milal khat ahungin ahitin ahi. Hichea milal ahiloule mithupitah pa hi Bible them hon Herod leng inpi a lhacha ho hiteijin te tin atahsan’ un chuleh hijong hitei ding ahi, ijeh inem iti leh Rome Government chun Galilee gam chu Herod lengpa khut noi ja anakoiju ahi.

Hiche milalpa hin Jesun melchihna tampi anabolho chu ahethna atahsan jeh chun achapa thi dingkon damna din Jesu henga atao tan ahi.

Ginchat umtah khat chu ama jong milal ahilouleh mithupi tah khat hija achapa damlou chu muntinna jong anajen tah ding tahsan ahin, hichu ahitah leh achaina Jesu bou chu akineppi ahi ding tahsan ahi. Chutia achapa damna dia Jesu henga ahung tao vanga chu achapa Capernaum'a um ahi. Cana kho, Jesu leh ama umna munna konna Capernaum chan chu mile 20-25 vel aphah ahi. Hichanna gamla ahijeng vanga chu milalpa chun Jesu henga "Pu, kachapa athikah-in hungsuh-in" atikitnin ahi. Chutia atahsan letje dan Jesun ahethpat chun Capernaum'a jong kumsuh deh louvin athilbol theina amang chan milalpa hengah, "nachapa ahinge chetan" atipeh-in ahi.

Jesu kamsung soh achapa thiding kon chu damtejjinte tia atahsan tah jeh chun, acha umna Capernaum'a chun akumsuh tan ahi.

III. Chapangpa aphatcha adam (51-54)

Milalpan Jesu henga tahsan tah-a achapa thidingkon damtheina dinga ataona tahsan puma Capernaum'a akumsuh leh milal khat ahijeh chun asoh ten kipah tah-in achapa dam jalchun analamto taovin ahi. Milalpa chun achapa damsella anaum amu chun adamphat chu ahethnom tan ahileh asohten "janhi nidan sagin akhosih in alhatai" atiuvin ahi. Nidan sagi Rome te phat simna nilhah nidan sagi ahin hiche phat tah-a Jesun "nachapa ahinge" atitoh akitochet tahjeh chun milalpa chun hiche melchihna Jesun abol jal chun "a-innsungmi chengse toh atahsan tan ahi."

Gospel danngho chun Jesun Galilee gamma melchihna abol tampi seijong leu hiche Gospel John sunpan ahethdol asut dung juija ni channa ahin, amasa twisih lengpitwi asosah-a chua milalpa chapa adamsah hi ahi.

Thuchaina

Jesun hiche lai ja agamsung leh amite ho ahin dalhah-a Galilee gamsung achotlut jenghin avetsah chu Galilee miten Judea gam mite sang chun Jesu atahsan jou ve ti akilangin, hiche dungjui

chun Jesun milalpa chapa chu apa tahsan letjeh chun Capernaum'a umchu Cana khoa konnin Jesun athaneinan adamsah in chuleh hiche jalchun milalpa insunga kikhelna alhung tan ahi.

Sopi nangma jong Judea gammite banga Jesu tahsan lella ijatvei nana um khah em? Galilee milalpan Jesu atahsanna chuleh hiche atahsanna chun tahsa leh lhagaova kikhelna ainnsunaga apohlut peh jeng chu gellin lang tahsa leh lhagao eisemthah peh thei pao Jesu heng jon tan.

THUDOH:

1. Palestine chu gamkai ijatna ana kihom khenna chuleh agam min ho chu ipipi ham?
2. Themgao ama gamsunga jabollain aumpoi kitihi lamdih loulam tah-a tulai Christian tampin iti aledoh uvem?
3. Galilee mite chun iti danna kipah tah-a Jesu anlemmu hintem?
4. Jesu hoilai munna aumma milalpa chun hoilai munna um achapa damna dinga hungtaova chuleh agamsung kikah chu miles ijat ham?
5. Achapa thiding kon Jesun adamsah jouva milalpa chun ipi abol tah em?

SIMMUN – 12

THUPI: JESUN NAKONG CHATMOPA ADAMSAH

Bible Simmun: John 5:1–18

Thulu:Khonungin Jesu'n ama chu houin'ah amun, ajah-a, Ven, akiboldama nahitai; chonse kit tahihin, ajole akhohjo cheh nachunga chugetninte, ati **(John 5:14)**.

Thumakai

Jesun Cana khoa melchihna ni abollin, amasan twisih lengpitwi asosah-in, ani channan milalpa chapa anaboldam kitnin, chuleh chungang hung kitah lang “Nakong chatmopa” Jesun aboldamsah hi John Gospel'a dinga Jesun melchihna abol athum channa ahitan ahi. Hiche-a Jesun nakong chatmopa adamsah hitoh amasa teni melchihna kibah louna aneijin ahi. Hichea melchihna abol jeh hin Judah hon Jesu chungang lungse agellu chuleh adang dang hetdinga lom cheng aban chan veu hite.

I. Nakong chatmopa damtheng (5:1–9)

Jesu Christa hi munkhat leh gamkhat keuseh a um ahilou dan kicheh tah in akimun hilaija jong hi “Jesu Jerusalem'a ache touve,” akitin ahi. Ipi dinga che ham iti leh hiche Jerusalem'a chu “Kut” thupitah (ipi kut ahi kicheh lou) khat uma hichea chu Jesu jong pang dinga che ahi. Hiche a “Kut” hi Bible them atamjon “Kalchuh Kut” (Passover Feast) hinte atiuvin ahi. Jerusalem Houin chunglam (north) sanga kelngoi kotphung (sheep gate) tia Nehemiah

3:1,32; 12:39 a kimu mun laitah a chu Bethesda twikul uma ahi. Bethesda kiti hi Hebrai pao ahin Thadou paova “lungsetna in” akitin ahi.

Hiche twikul hi Bible'in kicheh tah-a damna mun ahi ati lou vangin agam miho hetdolla hiche mun hi Pakai vantillin phat khat kom komleh ahung vil jia, hiteng chuleh twikul sunga chomlut manho chu itobang nat hijongleh anadam jiuva ahi. Jesun hiche lai mun aphah chun kum somthum leh kum get (38) jen chatmopa chu amutan ahi. Kumsot tah analup thudol chu Jesun aheth phat chun, “Nadam nom em?” atin adong tan ahileh, mipa chun adam nom behseh jeh-a amun alhun manjilou chu Jesu henga asej tan ahileh, Jesun alung asen ajah-a “Kipatdoh-in nalupna kichoijin lam jottan” ati.

Jesun chutia thu apeh bang bang chun hiche mipa chu adam jengin alupna jong akichoijin lam ajot tan ahi. Hiche nikho chu Sabbath nikho anahin ahi. Judah te chun Pathennin Mosi henga Sabbath nikho theng tah-a koi dinga anathupéh na bannuva hiche nikhoa bol ding leh bollou ding tampi jong anasemmu ahi. Vetsahnan hiche nikho hileh koitobang ham khat natong thilbol aum khah amudoh uleh songa selih ding tichan geija dan akisemmuva ajui laitah uva hi Jesun nakongchatmopa adamsah hi Judah ho dinga thi-mah umtah ahi. John Gospel sung goh hilouvin cholngah (Sabbath) nikhoa Jesun thil kidang phabep abolna a konnin Judah hon nasatah-in Jesu leh asejuiho anadouvun ahi. (Mk. 2:23; 3:4). Chutia Judah hon adou jeng vangun Jesun “cholngah ni chu mihem dinga kitem ahin, cholngah ni dinga mihem kitem ahipoi” atin, “mihem chapa chu cholngahni Pakai jong ahi” ati. (Mk. 2:27-28)

II. Judah hon akiboldam pa thudoh aneiju (5:10-13)

Chunga kisei banga Sabbath nikho palkeh ho chung a dan khoutah-a alahjiu bangtah chun, akiboldam pan Sabbath nikho a alupna ahin kichoija lam ahinjot jeng chu amu uleh Judah ho chu thangtom kisaova thilsoh umdol chu adoh uleh “Eiboldampa chun

nalupna kichoijin lang lam jottan eiti” ati. Thangtom tah-a um Judah ho chun hitobanga cholngah nia midamsah pa chu koi ahi aheth loujeh un akiboldampa adongun ahileh aman jong anahedeh pon ahi. Ajeh chu Jesu hiche phat tah-a chu anavah doh ahitai.

III. Judah hon Jesu tha agotnu (5:14-18)

Koijin eiboldam hintem tia lungdong tah-a akiboldampa aumjing laitah in Jesun hiche mipa chu Houin’a amun “ven akiboldamma nahitai, chonse kit tahih in ajo leh akhohjo cheh nachunga chugetinte” ati. Hichea Jesun asehi hin akiboldampa kum chujat chatmo a anaum chu achonset jeh ahidan aphochennin ahi. Hitia adammo chu achonset jeh ahi tia Jesun asehi vang hin dammona jouse hi chonset jeh ahidih pon ahi (John 9:13; Lk. 13:1-5).

Chutia Jesun eiboldam ahi ti aheth phatnin kipah tah-in Judah ho komma aseiphong le tan ahileh, Judah hon Sabbath nikhoa bolngailou bolpa chu Jesu ahi ahethphatnun abolset goh-u hilouvin thading geijin Jesu aholle taovin ahi.

Judah hon Jesu tha dinga aholleu chu Jesun aheth phat chun “kapan tugei hin na atongin keiman jong katonge ati.” Chutia Jesun asehi chu Judah hon ajah phatnun, Sabbath ni apalkeh jeh-a alunghan nabannun Pathen apa ahisah in chuleh Pathen toh kibangin akiseije tin aha lunghan be cheh taovin ahi.

Thuchaina

Pathen chapa changkhat Jesun, kum somthum le kum get chatmo a damding ngaicha-a umpa aboldam chun ,Judah hon Sabbath ni asuhboh keu hilouvin Pathen apa ahisah e tia themmo achan uva thading gei sanna Jesu ahol jeng bangun, tulaijin non-christian ho titah louvin tahsan chate lah-a jenga jong mit mu thei hihen, mutheilou hijong leh Pathen natoht lam chom chom ho douva mi tampi aumdoh tan, hiche tobang chonna leh lunggel hin Pathen lenggam hunglhun ding dan Bible-a kisei ho eigel dohsah un, hijeh hin nitin hinkhoa Pakai toh kilhakang louva umjing hin, hinkho aphalamma eipui diu ahi.

THUDOH:

1. Jerusalem' a Judah ho Kut khat aumme kiti hi ipi Kut pen hinte nati em?
2. Bethesda kiti hi ipi kiseina hija chuleh hoilai munna um ham?
3. Nakong chatmopa hi kum ijat mi hija, chuleh Jesun ipi bol dinga thu afeh em?
4. Jesun akiboldam pa henga chu i-tita hih-in ati em?
5. Jesun koi koijin na atonge tia Judah ho henga aseijem?

SIMMUN – 13

THUPI: JESUN A PATHEN HINA APHONDOH

Bible Simmun: John 5:19–47

Thulu: Chule hungdoh ding ahiuve; thilpha bolteho chengse hinna-a thoudoh dingu, chule thilphalou bolteho chengse themmo changa thoudoh ding ahiuve (**John 5:29**).

Thumakai

Jesu Pathen ahi tihi kinelna nasatah anaum jinge ti Bible mundang danga jong kicheh tah-in akimun ahi. Atahbeh-a seiding chun Jesu Pathen ahi tihi hiche lai ama leisetna alenlaija miho dinga chu tahsan theihoi chu anahipon ahi. Ijeh inem itileh miho chun tahsa lam dolla Jesu chu Joseph le Mary chapa ahi aheth chetnu ahi. Tahsa mihem'a hung peng ahitah jeh chun mihemte bangin gentheina tintang athoh in tahsa thina chan achang tan ahi. Jesun tahsa mihem lim leh mel aput jeng vangin athusei anatoh chuleh ahindan hoa konnin mi tampin jong a Pathen hina anahedoh un, Israel ten anagaldot jingu "Messiah" chu nahi tichan seidoj jong aumda pouvin ahi. Chutia Jesun melchihna tampi a Pathen hina a abol cheng goh hilouvin, Jesu amatah in Pathen ahina leh thil ijakai bolthei ahina, chuleh tonsot hinna ama a aumdan ivet khom diu ahi.

I. Jesun Pathen toh thaneina kibang anei (5:19–21)

Jesu Pathen toh kibanga akisei jeh-a achunga Judah ho nasa tah-a alung phatmo piuva thina changei gotna pehdng tia

aholle jing vangun, hiche chang sunga hin Jesu amatah Pathen toh thaneina anei khom lhon dan akimun ahi.

Jesun “Chapa chun ama chammin ima abol theipoi” atin ahi. Hiche hin avetsah chu Jesu hin ama cham tah-in ima abol poi ti avetsah keu hilouvin apa Pathen toh kiguijopna hoitah aneilhon leh atoh toh lhon atoh khom lhon dan akimun ahi.

Jesu hi Pathen chapa hijongleh apan abol tobang banga jong abolthei ahi. Chapan apa bolthei jouse abol lah-a kimin phah chuleh datmo um pentah chu mithi ho ahinsah thei hi ahi. “Pan mithi ho akaithouva ahinsah banga, chapan jong ahinsah nom nom ahinsah ahi.” Jesun tahsa mihem hina lhingset anei banga hi Pathen hina lhingset jong anei ahin, hiche a Pathen hina lhingset chu mihemte dinga angahna thina chan geija jong hinna apeh thei ahi. Hinla aman hiche apa, Pathen toh kikot tenna aumchu mangkhel lou hellin apa thusah tah chun abolji bouvin ahi. Hiche hin Pa leh chapa kipumkhat dan kicheh tah-in eimusah-un ahi.

II. Jesun Pathen toh thuneina kibang anei (22-30)

Chunga kisei Jesun Pathen toh thaneina kibang aneija lung kitoh tah-a abolla atoh jeng seh hilouvin “thuneina” jong Pathen toh kibanga anei ahi. (5:22) “Thu tan ding jouse chapa apehdoh ahitai.” Pa komma chu imajouse umchamkim ahin, hiche ho chengse chu aman anei bang banga achapa apehdoh ahitai. Hicheho lah-a thutanna a chonse ho leh chonpha ho chungga thaneina chapa kipe ahitan ahi. Hiche titah louvin Jesun “Chapa jabol lou chun ahinsol pa chu ajabollou ahi,” atikitnin ahi. Hiche hin avetsah chu thiljouse hungkon dohna Pathen chu mijousen kijabol ahin, ama ang sunga koimacha ding ngamlou hel ahibanga hi mihemten chapa jong ajabol diu amavang koitobang chapa jabollou aumkhah khat tou leh amachun Pathen jong ajabol lou chuleh athua jong nunglou ahi.

Hichan geija thuneina Pathennin apeh chapa ama thusei ngai ho leh ahinsolpa Pathen tahsan jouse chun “tonsot hinna anei ahitai.” “tonsot hinna” aumle “tonsot thina” jong aumme tihi

kinelna bei ahi. Tahsa mihem khat chun ahinna athi jou teng leh nikhat le thoudoh kit ding ahi. Hiche tho kitna-a chu abang tonsot hinna a thoudoh-a abang tonsot thina-a thoudoh ding ahivu. Hiche tonsot thina-a thoudoh ho chu thi nina changdiu ahitai. Thi nina umdan chu; tahsa hinna thi hi, thi khatna ahin, nina ahileh, atahsa hinkho umlaija huhhingna neilouva thiho tahsa athodoh kit jou teng lhagao thina ahilou leh tonsotna ka leh hagelna a umdingho atina ahi. Hiche ahitah jeh-a chu Jesun thilpha bolteho chu athodoh jou teng leh athilpha bol bang cheh uva achung uva thu atan ding, chuleh thilphalou bolla thoudoh ho jouse chu athilphalou bol jeh uva themmo achansah ding ahi. Hichan gei thaneina loupitah chu Patheennin chapa khutna apehdoh ahitan, hinla chapan apa phatsah dung juija athu atan kit ding bou ahi. Ijeh inem iti leh Pa leh chapa chu kikhen theilou ahi.

III. Hettohsah (31–47)

“Hettohsah” kiti hin John Gospel aloupi sah chom lneh in ahi. Leiset thudolla Court (thutanna) munna jong khu witness (hettohsah) umteiji ahi. Thutanna munna kihet teni koitobang hettohsah neilou chu themmo chang jia ahi. Hiche tobang golla chu Jesu Pathen cha ahijeng vanga chu leiset mihemma hung ahitah jeh-a chu Pathenna konna hung ahi chu mihon ahettohsah ding chu thupi tah khat ahi. Angai dolla jong Jesun “Keiman keima thu kahet tohsah hile kathu hettohsah chu dihlou ahi.” Tia asej banga mihem koi hileh midangin aphantna seijo louva ama jengin ama phatna kisei hi tahsanna lhomjep mong ahi.

Ahinla John Baptist in “Veuvin Pathen kelngoinou khu” tia Jesu phondohna le hettohsahna ahinnei chun John ama seijui ho jeng tah jong chun Jesu chu Pathenna kon hungkon ahi atahsannun anung anajui taovin ahi. Hinla Jesun John hettohsahna sanga ama apan ahinsol lona leh apa chungchang ahettohsah hi chungnungjo ahi atin ahi.

John Baptist in Pathen mihemte mitmu thei tah-a hung “Chapa” thu ahettohsah ahin, hinla chapa chun mihemten amitmu

uva amutheilouvu Pathen chu hettosahna ahung nei ahitai. Johnnin chapa ahettosah a, chapan jong Pa ahettosah na bannin, Pan jong chapa ahettosah kitnin ahi. Pa chun iti lamdolla ahettosah ham itileh, “koiman pa mel chu amukha poi” ati. Pa chu leiset mihemte koima amukha aumtah loujeh a chu Pa chun ama mel chu achapa a ahung lahdoh ahitai. Hiche hin avetsah chu chapa chu Pathenna konna hung ahidan leh Pathen ahidan aphotchenna chuleh ahettosah ahitan ahi.

John Baptist, Chapa amatah chule Pan hettosahna aneina bannun “Pathen Lekhabun” jong chapa chung chang ahettosah kitnin ahi. Jesun hiche “Pathen Lekhabu” (Scripture) chun “Keima thudol ahettosah ahi” ati. Hiche-a “Pathen Lekhabu” kiti hi Thulhun lui (Old Testamta) Bible kiseina ahin, hinla Jesun hiche lekhabu bung le chang laitah-a ama chung chang akiphah poh seidoh hijong leh, alhangpi’a Thulhunlui sunga thil kibol ho jouse hi Christa hungding limma kibol ngen chu anahin ahi.

Jesun hichelai munna athuseina mihon hettosahna hijat aumjeng vanga atahsan deh louvu pohnatna aneijeh chun thugil tampi aseidoh in Israel te dia suhmil thei hilou Mosi jeng jong chun ama (Jesu) thu anasutnin aseidoh jeng tan ahi. Hichan geija tahsa lamma chapang cha Jesun aseidoh hin Judah ho lungthim asuhnat lneh ding tahsan aummin ahi. Atahbeh-a Mosi um masang peh peh-a jong Jesu anaumsa ahitai.

Thuchaina

Jesu hi Pathen chapa ahijeng vangin apa Pathennin imacha itpeh umlouvin, aman thilsem ho jouse chung thaneina anei bang leh, tu hihen chuleh ahung lhung ding phatna thina hihen hinna hijongleh thuneina apeh goh hilouvin mihemten ama (Jesu) a hinna aneithei teina diuva, Pathen amatah jengin jong amelput Jesua ahinlah doh-a ahettosah jeng bang hin, eihon jong imajouse chung Pathennin thaneina leh thuneina apeh achapa I Pakaiyu Jesu Christa hettosah-in pangjing tao hite.

THUDOH:

1. Jesun pa banga thaneina anei vanga achamtah-a Pa jao louva abollou chun ipi avetsah em?
2. Pan chapa chu ipi apehdoh hitam?
3. Thi nina kiti hi hilchennin.
4. Hettohsahna hi mihemte dinga ichanna loupi ham?
5. Ipi chu Pathen lekhabu kiti hija chuleh Jesu chungchang chu kojjin anasut ham?

SIMMUN – 14

THUPI: JESUN MI SANG NGA AVAHVA

Bible Simmun: John6:1–15

Thulu: Chuin Jesu'n changlah alan; thangvahna aneijouvin aseijuiho ahoppeh-in, chule seijui hon atouho chu ahoppeh-un; chutobang chun nga jong chu, agot chanun apeuvin ahi (**John 6:11**).

Thumakai

Jesun mi sang nga (5000) avahva hi John Gospel sunga Jesun melchihna abol athum channa ahitan ahi. Hichea mi 5000 Jesun avahva hi mun danga melchihna abolho toh kibah louna aneijin ahi. Melchihna dangho chu Gospel mun danga jong akiha mu pon hinla hichea mi sanga Jesun avahva hi Gospel thum (Synoptic Gospels) hon jong asun cheh un ahi (Matt. 14:13-23; Mk. 6:30; Luk. 9:10-17). Hiche hi thilsoh kidangtah khat Jesun ama a Pathen hina-a thilkidang melchihna abol ahin, tun hicheho chu veu hite.

I. Mi tampin Jesu nung ajuj'u (6:1-4)

Hiche lai hin Jesu Galilee dillen kiti Tiberia dillen tia jong kihe Capernaum kho komcha twipi gallam chun agalkai tan ahileh mipi atamma tam chun Jesun melchihna aboljing ahijeh chun, itobang thil kidang melchihna ahinbol kit dem tin Jesu nung chu kihon dem dummin ajuj taovin ahi. Mipi chujatpi chun datmo leh melchihna Jesun abolho chu vetnomna jeh mai mai jong hipontin, amavang anung jui mipiho jong chun Jesu-a konna

ngaichat khat cheh nei puma ajuju hitei din jong tahsan ahi. Phat chomkhat achejou uchun Jesu molchung vum lamma chun akaldoh'in ahi. Hiche phat hi Judah ho kalchuh kut (pass-over) kivah chu naija ahitai. Lengpa khutna konna Pathennin Mosi ahin lamkai sah-a ahinpuidoh janna thilsoh melchihna-a Judah ten kumseh-a tuni channa ahin nitjing jengu phatchu naija ahitan ahi.

Hiche kalchuh kut (passover feast) kiti hi Hebrew ten "Pasach" chuleh Greek ten *Paskha* atiuvin ahi. Amasa hihen anunung hijongleh adoi pentah chu "kalchuh" kiti Egypt lengpa lungtah behseh jeh-a Pakai vantillin Israel te henga Egypt ahin dalhah ding jantah uva Israelte Egypte toh akihet khen theina diuva akot beng uva gan thisan anusah-a, hiche jouva Pakai vantil hon Israel te chu akalchuh a Egypte aban thao chu ahi. Hiche janna ahung sochat uchu Israel ten tuni channa anitjing jengu kut loupitah khat chu ahi. Hichea mipin Jesu nung juiho jong hin hiche kalchuh kut dinga kigosa demma umdiu ahitai. Ijeh inem itileh hiche nikho tengleh kelngoi hihen gancha dang dang hijongleh athaova Pathen alhai jiu ahi.

II. Philip leh Andrew in Jesu akithopi lhon (5-9)

Jesun achele na channa aseijuite akipuile jing ahitoh lhonnin hiche a hin seijui mini toh Jesu akihou limmu akimun ahi. Amasan, Jesu ahung dadoh-a mipi chujat amu phat chun seijui ho lah-a Philip Bethsaida khoa konna pa (1;44) henga chun Jesun "hiteho neh ding changlah hoija ichoh dingu ham ati" Bethsaida kho hi hiche thilsona munna konna hi naicha ahin, Philip ma hi hiche khoa kon ahileh thilkhat ngatio theijinte tia amaho het dinga Jesun adoh ahiding jong tahsan aummin, ahitah beh a ahijong leh Philip chun gabol monghen tina hipontin amavang mipiho lunghtim vetna-a chu aseihiding tahsan ahi. Jesu vang chu aumlou umseh thei chuleh aumsa sumang thei ahijeh chun, mipi ho lungvetna a aseihiding ahin ahi. Hitia Jesun aseihiding hi Philip chun atahsannin "them cha cha changdiu hijong leh dangka jakhat mannin toh ponte" ati. Dangka jakhat tia Thadou Bible'in aseihiding "dangka jani" (200

denarii) joh ti ding ahi. Denarii khat hi hiche laiija mikhat nikho thalo mantoh kibang ahin, Denarii jani ahileh mikhatnin lha sagi lhaget alo tei ahi. Chujat ahijeng vang chun Philip chun Jesu henga hijat jong hin mipi chu kivah jou ponte ati ahi. Philip'in Jesu chutia adonbut jou chun seijui ho lah-a Andrew, Simon Peter sopipan alah uva chapang khatnin "changlhah pheng nga leh nga ni" anei chu Jesu henga lung opkaina nei pummin aseitan, chutia Andrew vin aseivanga chu mihem chujat neh dinga chapang pa thilnei chu kidoi asah him him lou ahi.

III. Jesun mipi avah va (10-15)

6:10 "Miho chu tousah-un," John Gospel hin "mipi sang nga jen" atin, matthew 14:21, "numei chapang sim louvin mi sang nga jen ahiuve" ati. Matthew sei dungjui ahileh mi sangsom vel himaithei ahi, ajeh chu alah uva numei chapang jong umtei ding ahi.

Jesun mi chujat changlhah pheng nga leh nga nia vahva ding ati jeng hi mihem lung gella vang hithei him him lou ahi. Aneh diu hop peh jong chu lunggim umtah ahi. Mark chun seijui ho chun mipi chu somnga cheng, jakhat chengin atou khen sah uve atin ahi. (Mk. 6:10)

Chutia seijui hon ane dinga mipi ho ahoftup chet phat nun "Jesun changlhah alan Pathen athangvah in ahi". Changlhah alah-a aneh masanguva Pathen thangvahna apeh hi thilthah beh jong ahidih pon Thulhun lui khang laiija Israel te jong chun anehna chunguva Pathen thangvahna ana neijiu ahi. Hiche laiija goh hilouvin Jesun Gospel lekhabu mun dang danga jong a an neh masangu leh Pathen thangvahna aneiji mong ahi. Hitichun Israel ten anachepiu hijong leh hichea Jesun "Pathen athangvah na" vang hi hiche chaanglhah pheng nga leh nga ni chu mihem chujatnin anekhopna diuva phatthei aboh ahi.

Jesun phatthei aboh jouvin aseijuite chu apedoh in mipi ho chu ahopsah in ahileh koima achanglel bei hellin aneuvin avaset

soh taovin ahi. Chutia mipiten aneh vaset phatnun, Jesun seijui hojah-a anehmoh-u aval chengse chu amahthah umlouva lohkhom dia thu apéh dungjuijin seijui hon aloh khommun ahileh anehval uchu “paipéh som leh paipéh ni” alohdoh-un ahi. “Paipéh” kiti hi Thadou ten masang laija thilpohna a manchah phapen khatle man jangkhai khatna ina neiju, ahilou leh tugeija inei jingu khat ahijeh a Bible anale doh masapen Pu Ngulhao Thomsong in hitia hi analedoh ahin, English ten “Basket” atiuvin tulai khangthah ho hetbai lam dia “Pocha” tia jong het thei ahi.

Changlhah pheng nga leh nga ni a mihem chujat vahva a anehmoh-u aval chujat jong umkit chu datmo umtah ahitah jeh chun mipi ho chu akihouvun, “themgao vannotija hung dinga chu ama among mong hi ahi,” ati taove. Mipi kikhom ho kihoulim nah in avetsah chu Deut. 18:15 na Mosin, Pakai Pathenin keima tobang themgao khat namiteu lah-a konna nasemdoh peh diu, ama seichu nangai diu ahi” tia anasei chu ageldoh sah-u ahiding tahsan umtah ahi. Chutia Jesun thil kidang melchihna abol jeh-a tahsanna aneitah jeh-un mipi chun Lengchansah din ago taovin ahileh Jesun akihetnin hiche mun chu adalha tan ahi.

Jesu Christa vannotija ahunglona jeh pentah chu tahsa lamma Israelte mi khutnoija ana umu huhdoh ding ahapon, amavang tahsan jalla alhagao’u hinkho tonsotna them chansah ding joh a hung ahi.

Thuchaina

Jesun melchihna abolho lah-a datmo umloitah mihem “sang nga jen” changlhah pheng nga leh nga ni a avahva hi ahi. Mipi ho chun Jesu thilbol theina ama ama tahsa chung a chuh ding deija Jesu nungchu ajuileu ahi. Mipin adeipen tah-u melchihna Jesun abol amuva kidang asah uva Lenga pansah ding atiuhin avetsah chu tahsalam hamphatna ding jengin Jesu chu anagellun, ahunglona lhagao hinkho hamphatna pa ana geldoh him him tapouvin ahi.

Hiche lai mihon tahsa lam hamphatna ding jeh-a Jesu nung anajui banguva hi sopi nangman jong tahsa lam hamphatna ding mai maija Jesu nung nanajui khah tah-a ahileh Jesu hi tahsa leh lhagao akop gomma damsah thei hihen lang nachunga Jesu Leng chansah tan.

THUDOH:

1. Kalchuh kiti hi Hebrai leh Greek paova ipi hija chuleh ipi jeh-a hiche hi kutna hung kimang doh hin tem?
2. Philip hoilai kho-a kon ahileh akho umdol seijin.
3. Dinarri jani manlut dan seijin.
4. Simon Peter sopipa Andrew vin Jesu henga ipi thu ahung seijem?
5. Ibolla Jesu vannotija hung ham?

SIMMUN – 15

THUPI: JESU HINNA CHANGLHAH AHI (Part 1)

Bible Simmun: John 6:16-34

Thulu: Jesu'n adon butnin ajah uvah, Ahinsol hi tahsan leuchun hichu Pathen natos ahi, ati (**John 6:29**).

Thumakai

Jesun min sanga jen changlhah phenga leh nga ni a avah va kidang tah a ihet utoh lhonnin hilaija Jesun, “keima hinna changlhah kahi” ati hi hung kijoi jin aum theijin ahi. Jesun thu ahilna chanleh anatohna channa agamsung miho hindan leh kiman chah dannin thu ahiljing jin, hiche banga chu mipi chujatnin vasetna aneh'u changlhah chutoh Jesu ama kite kah a “keima hinna changlhah kahi” ati ahin, hiche hinna changlhah chu iti lam panga mihon akisanuva anehte na dinguva Jesun athuhil bannei chan veu hite.

I. Mipi hon Jesu ahollu (6:16-25)

Jesun melchihna abol (mi sang nga) avah va kidang asah uva hitobang thilbol theipa hi ana kiseisa themgao chu ahi tia, leng dinga pansah ding ati tah-un Jesun aumnao mun chu adalhan mun chomma achetan ahi. Ama (Jesu) apotdoh jou chun seijui ho kongkhat chung a akaldoh un dillen gal lammah galkai din akitol taovin ahileh, jannin Jesun twi chung a lam ahinjot tan seijui ho kong chung a chun atouvin thakhatnin agallang khat agalkai taovin ahi.

Chutia Jesu agalkai jeng chu adalah mipiho chun ahelou jeh un, Jesu chu aholle le jengun hinla mipi hon kong dang khatna dillen ahung galkai uva Jesu anaum adatmo lseh jengun “Rabbi itih-a hila nahun ham?” atiuvin ahi. Jesun Pathen chapa ahina apohdoh-a twipi chunga alamlah jeng hin mipi changlah leh nga a avahva ho jouse lungthim asuham dang ahitan ahi.

II. Vanna konna changlah (23-34)

“Keiman nangho tahbeh-a kaseipeh nahiuve” Jesun “tahbeh a kaseipeh” ati hi 6:26, 32, 47, 53 chang ho a jong akimun ahi. Hiche hin avetsah chu athusei hi mipi hon phatah-a angai uva ahelou uva atahsan tei diuva kisei ahi. Changlah pheng nga leh Nga ni-a avahva mipi chujat lungput chu atahsao oiva nading ahelou phah lou jeh uva chu Jesun amatah chu hiche “tonsot hinkemlou” an hom dinga Pa Pathennin anamdet chu kicheh tah-a aseipeh ahi.

Chutia Jesun aseichu mipi hon ajah phatnun “Pathen lunglam na katoh theina dingua ipi kabol ding ham?” atiuvin ahi. Hinla Jesun mipihon danthu leh natoh a Pathen lunglam anaholjiu banga Pathen dei holdoh ding atiu chu ahelou jeh chun “ahinsol hi tahsan leu chun, hichu Pathen natoh ahi’ atipeh’in ahi. Hiche hin avetsah chu huhhingna hi natoh vanga hilouva Pathennin ahinsol achapa tahsan na a konna kimu ahi avetsah ahi.

Jesun Pan keima eisol ahin, nei tahsannun tia aseipeh chun mipi hon adonbut nun “katahsan theina dingua melchihna ipi nabol em?” atiuvin melchihna, masang laija gamthipma apu teu apa teu Pathen’in manna a nisomli jen anavah chu aseipeh taovin ahi. Amaho gella chu Jesun nga ni leh changlah pheng nga a mipi avahva sanga Mosin vanna konna manna a avah vao chu thupi asahjoh-u hintin hiche sanga melchihna kidang chu Jesu henga angh-u ahi. Chutia melchihna angh’u Jesun ahelou phatnin “tah beh beh a kaseipeh nahiuve” atikit tan ahi. Tah beh beh-a aseipeh ho chu:

1. Vanna konna changlah napeuva chu Mosi ahipoi
2. Vanna konna changlah tahbeh chu kapan bou napeuve.

3. Pathen changlah chu vanna konna hung kumlha vannot hinna pe-a chu ahi.

THUDOH:

1. Rabbi itih-a hila nanalhun ham? Tia Jesu dongho chu koiho hiuvem?
2. Pa Pathennin ipibol dinga Jesu chu anamdet hintem?
3. Mipin danthu leh natoh a Pathen lunglam holdoh ding atijeh uva Jesun ipi anasei peh em?
4. Jesun tahbeh beh-a aseipeh thum ho chu ipi pi ham?

SIMMUN – 16

THUPI: JESU HINNA CHANGLHAH AHI (Part 2)

Bible Simmun: John6:34-71

Thulu: Jesu'n ajah uva, Keima hi hinna changlhah kahi; kahenga hunga chu gilkel talou ding, chule keima eitahsana chu dangchah talouhel ding ahi **(John 6:35)**.

I. Keima hinna changlhah kahi (35-51)

Jesun “keima hinna changlhah kahi” tia asehi John Gospel sunga Jesun “keima” hiche kahi tia chonse hon ahinbel theina diuva asehi sagi holah-a khat ahi. Changlhah hi hichelai mite dinga chu anpha pen jingkah nilhah a oivana ana nehjiu an chu ahi. Eiho tulai dinmun nin vang changlhah sangin bu (rice) hi agam chen dungjui jin ithupi sah jo-un mihem atamjon changlhah hi an nin akinganse theipon, anganse mi loikhat jong chu alung himo pi lleh jin ahi.

Hijeh a hi Jesun hiche an thupi pentah-a aneiju toh lhonna pheng nga lele a mihem chujat avahva chutoh vetchep ma “keima hinna changlhah kahi” atia “kahenga hunga chu gilkel lou ding ahi” tia asehi. Jesun hichan geija Pa a konna ahung kon ahi dan ahilchet vanga mipin atahsan nao alhasam behseh jeh chun Pan mihemte chonsetna a konna huhdoh a tonsot hinkemlou anei theina diuva chuleh hinkemlou neiho jong chu atahsao hinna thita jong

leh ninunung niteng aman (Jesu) kaithou ding ahijeh-a vanna konna ahinsol lhah ahidan ase i ahi.

Chutia Jesun vanna konna hung kumlha changlhah kahi tia ase i chun Judah ho aphunnun, 6:42 “Joseph chapa Jesu anu apa eihon ihetnu chu amahi hilou ham?” tia akihoulim uchu Jesun ahen amaho nelkalnan Pathen’ a hungkon ama changseh ahidan leh aman bou Pa chu amukhah dan aseijin hijeh a chu aman (Jesun) tahbeh beh in thu ase i kitnin, “keima eitahsanna chun tonsot hinkemlou anei ahitai” atikit nin ahi.

Hiche Jesu thuseina a konna gah hetdoh ding chu Jesu Cross a kikhetbeh masang leisetna alenlai jenga jong hi ama tahsan chan chun huhhingna anei ahitai tihi chung a kipe chang hin aphotchen ahitai. Judah hon apu apa teuvin gamthipma manna ananeh utoh Jesun melchihna abol atekah-u chung lamma kimu avellin Jesun aseikitnin hiche manna chu napu napateu vin aneovin hinla amaho athi gam taove ati. Hinla Jesun phong tah’ in “koi hijong leh hiche keiman kapeh changlhah ne-a chu tonsotna hingjing ding ahi,” ati. Jesun changlhah vetchepna a ase i ahin, koi hileh ama sang chan chu tonsotna hingjing diu ahitai tia aphondoh ahi.

II. Mihem chapa sa neh (52 - 59)

Chaang 51 na a “kapeh ding changlhah chu kaphe hi ahi” tia Jesun ase i chung chang hihen noiya ho hijongleh Bible them tampin Jerusalem indan chung a Jesun aseijui ho toh antheng ajonuva ase i thucheng “hiche hi katahsa ahi” (Matt,26:26) ati hitoh thakhat ahi atiuvin, “antheng” aseijui ho toh aneh uchu seijui hon ama (Jesu) ageldoh jing jeng na dingu ahin, hiche-a Jesun “kasa nea kathi don chun tonsot hinna anei ahitai” ati vang hi Christa ama tahsanna huhhingpu dinga kisan ho chu aseina ahitan, chutobanga ama (Jesu) kisan ho chu tahsa a thita jong le leh thokitna tengleh aman (Jesu) athilah-a konna akaithou ding ahidan aphondoh ahi. Jesun hiche thu hi Capernaum Synagogue (kikhopna in) a ase i ahin, Judah ten asuhmilmou gamthipma manna apu apateu vin aneh uva athigam bangu hilouva aman manna apeh pa/nu vang chu tonsot na hingding ahi.

III. Jesu thusei mipin anelkal (60–66)

Judah hon Jesu ahungkon dohna anu apa geija kicheh tah-a ahetnao hin, “keima vanna konna hungkumlha hinna changlhah kahi”, “Pathen Kapa ahi” “keima eitahsanna chun tonsot hinna anei ahitai”, “keiman ninunung leh kakaitou ding” ati leh adang dang aseiho hin nasatah’in seijuiho chu asulung hange akitin ahi. Hiche “seijui” hi somleni ho keuseh ahapon hiche phatna ama nungjui ho cheng chu aseina ahi. Mihon Jesu Pathen akhisah atahsan deh louhel phatnun, Jesun avellin Pathen’a hungkon ahidan ahilchen kitnin hinla mipi tampin atahsan thei deh pouvin, amaho chun Jesu umna mun chu adalhauvin ama gamlam cheh akinungle taovin ahi.

IV. Somleni hon Jesu atahsan (67-71)

Jesu nungjui mitampin athuhil sang theilouva adalhah jeng phatnun, Jesun aseijui somleni ho hengah “Nangho jong nache nommun” atitan ahi. Hinla alah uva mihangsan tah Simon Peter in “Tonsot hinkemlou thu nanga bou uma hoija kache dingu ham?” ati, chuin “Nangma Pathen hing Chapa Chrsita nahi chu keihon katahsan’un chule kaheuve” tin Peter’in aphongdoh tan ahi. Chutia Jesu Peter’in aphondoh hi pahtah a ivetleh Jesun ama Pathen’a hungkon hinna pepa ahidan aseiho hi phatah a atahsan ahitan ahi.

Peter’in hoptentah a somleni seijui hon katahsan uve tia aphondoh ding vang chun Jesun alah uva mikhat Juda Ischariot in apeh doh ding chu ahemasan “nalah uva diabol khat aume”, atipeh tan ahi. Atahbeh chun Jesu mandinga hunggho hinlamkaija dangka-a Jesu kijohdohpa chu Juda Ischariot anahitai.

Thuchaina

Changlhah a avah va mi tampin Jesu chu lhagaova oiva nading donlouva tahsa oiva nading jenga akisah lunggimmu chu aven ahileh alung asen “keima hinna changlhah kahin chuleh kasa nea kathi donna chun tonsot hinna anei ahitai” tia alhangsap jeng vang chun mipi chujat chun asangtheipouvin, seijui somleni ho

lah-a Judas Iscariot jeng jong chun Jesu hinna changlhah ahichu anasang pon achaina ana kijoh doh tan ahi.

Sopi nangma jong Juda Ischariot banga phat sot tah Jesu nung nahin juina a hi ama (Jesu) hinna changlhah ahi hi nahet chet monga chuleh nakisan mong hinam? Nakisan tah-a ahileh aphai, ama kin bollin pon pannin, amavang nakisan tah louva ahileh tonsot hinna napetheipa Jesu chu tunin kisan tan.

THUDOH:

1. Judah ho chu ibolla phun hiuven?
2. Jesun kapeh ding changlhah ati hitoh Jerusalem indan sunga aseijui somleni ho toh jan an aneh-u kibah loudan seijin.
3. Gamthipma manna toh Jesun apeh changlhah akibah louna seijin.
4. Peter'in Jesu chu iti aphondoh em?
5. Apedoh dingpa Jesun aheth masat phatna seijuiho henga ipi aseijem?

SIMMUN – 17

THUPI: KUT LAIJA JESU THUHIL THEMMO KICHAN (Part 1)

Bible Simmun: John 7:1-24

Thulu: Ama chama thuseija chun ama kichoi-at ding agot ahin, asolpa choiat ding go-a vang chu, ama chu dihtah ahin, ama-a chu chonphat louna aumpoi (**John 7:18**).

Thumakai

Pathen'in vannoi mite chonsetna a konna huhdoh dinga achapa changkhat set Jesu Christa leisetna ahinsolla ama tahsan channin hinna anei ding ahijeng vangin, Jesu leisetna alenlai chun gentheina tin tang anathoh in ahi. Tunia isimmun jenguva jonghin, Jesu amatah sopiho jengin jong atahsan joulou dan holeh Kut lai ja athuhil nelkalna a Juda lamkai hon Jesu asan nomlou dan kicheh tah-in akimun, hicheho chu banneichan veu hite.

I. Asopi hon Jesu atahsan louvu (7:1-13)

7:11 “Hicheng jou chun.....” ati hi phatah-a ivetle bung 6 nalamma kalchuh kut hi April (lhatun) lha ahin, hiche Kut kichai ja chu Jesu Judah gamma aumnom tapon Galilee gam lamma achetan ahi. Galilee gam melchihna tampi abolna muna avale jing lai chun Jerusalem'a lhambuh kut kimanna ding phat anaitan Jesu jong hia chu chetei ding ahi. “lhambuh kut” (feast of tabernacles) hi tulai eiho phat sim dung juija October (Ellha) leh Juda pumpin thanom tah-a nikho sagi tuni channa aman jingo khat ahi. Hiche

lhambuh kut hi masang laiija apu apa teo gamthip laiija ponbuh neo cha cha anason uva genthei tah-a Mosi lamkaina a anaummu chu geldohna aman jiuva hichea hi Pathen thangvahna aneiju ahi.

Jesun thil kidang melchihna tampi aboljing tah vang chun asopi ho jengin jong atahsan pouvin, hijeh chun Jesu achea muntinna melchihna abolla vannoi miten ahet theina ding tin asopi hon jong asol sol taovin ahi. Hinla Jesun “tun kaphat alhing hih laiije” atipeh in ahi. Hiche a Jesun “kaphat” ati hi ahinsolpa apa Pathennin aphonдох phat lhing loulai ahi.

Asopi hon Jesu kutna ache-a gakiphong dinga asol uchu Jesun amaho joh chu ale sollin amaho nungin Jesu hiche kutna chun guhthimmin achen ahi. Judah hon Jesu thading tia lung angaito jeng vangun, Jesu chu mipha ahi tiloi jong aumda pon ahi. Hinla lhangphong tah-in koiman Jesu chu aseipha ngam pouvin ahi. Ajeh chu hitobanga seipha cha cha chu Judah lamkai hon anabol genthei jiu ahi.

II. Jesun athaneina Pathen’a kon ahi thu ahil (14-24)

Lhambuh kutna Jesu ache jeng vang chun nikho phabep pi sung chu Judah mipin Jesu anamulouvu ahi. “kut kimtah ahiphatnin Jesu Houin’a achetou vin” hia kut kimtah atihi, kut nisagi aman uva ahileh anithum channi vella hi Jesu hou in’a thu ahil ahiding tahsan ahi. Jesu thuhil chu akikhom mipi ho chun maichan adatmo tapouvin ahi. Ajeh chu mipi tampin Jesu chu tahsa lamma ahung seiletna mun phatah-a ahetsuva athuhil chu kidang asah-u ahi. Chutia mipin ama thuhil dinga kitalah asah uchu Jesun ahen noiija bang hin athuhil umdol aseipeh Tan ahi;

1. Kathuhil hi keithu ahipoi
2. Kathuhil hi Pathenna kon ahi.

Jesun athilbol jouse hi ama chamma abol khat jeng cha jong aumpon, apa a

konna ajah-a chuleh amu cha cha bou chu aseija abolji ahin, hichu apa Pathen loupina ding ma ma ahijin ahi. Athusei leh athilbol jouse hi ama kichoi at nading hilouvin apa joh choiatna ding ahi. Jesun Judah ho kiletsah leh danthua akisonnu chu aheth chun “Mosin nangho chonna dan napeh louvu ham?” tin taipongna anei jin ahi. Chep natan’u jong chu Mosi masang peh-a anaum pului Abraham’a hung kipan ahitai tin akiletsahnao chu asuh nem peh tan ahi.

Judah ho Mosi dan hoitah-a jui bukim dana akigel jing jeng vang uva cholngah nikhoa chep atan jiu chutoh Jesun cholngah nikhoa nakong chatmo adamsah chu atekah-in ahi. Ajeh chu cholngah nia Jesun mi adamsah jeh-a chu Judah hon Jesu thu dihtah-a tan dinga Judah ho chu ana housal ahi.

THUDOH:

1. Lhambuh kut umdan hilchen’in.
2. Judah ho chun ibolla Jesu aseiphat ngam louvu ham?
3. Jesun kathuhil chu itobang ahi ati em?
4. Jesun Ka-phat alhing hih lai je ati hi ipi aseina ahi hilchen’in.
5. Jesun Judate kiletsahna chu iti asuh nem peh em?

SIMMUN – 18

THUPI: KUT LAIJA JESU THUHIL THEMMO KICHAN (Part 2)

Bible Simmun: John7:25-53

Thulu: Chule mipi lah-a mi tamtah-in ama chu atahsan taovin, chule Christa chu ahung tengle, hichepan abol melchihna ho sanga tamjo abolnah dingham? Atiue **(John 7:31)**.

I. Mi tampin Jesu atahsan'u (25-31)

Jesun ahung kikhom Judah ho chutia asosal chu amahon ajah phat nun, Judah ho chu amaho leh amaho Jesu chung chang akidong to uvin, tha dinga agotpao chu ama hi hilou ham? Vaipo hon amatah hi Christa ahi chu aheth mongu hitam? Tia akidohto jing laiju hin mi phabep min Jesu Pathen chapa vang chu ahung konna kihelou ding dol ahin, hinla keihon ama hi ahungkon dohna kahei atiuvin ahi. Ajeh chu amaho chun tahsa a ahung penna Joseph le Mary cha ahi chu aseiju ahi. Mihemte chonsetna a konna puidoh dinga Pathen'in achapa changkhat Jesu mihem'a ahin pensah chu chuche laiija Judah ho chun ana hetthem theilou hellu ahin ahi. Jesun ahungkon dohna chung change Judah ho achuti kinelnoh uchu Jesun aheth phatnin "keima kacham'a hung kahipon eisolpa chu dihtah ahin ama chu nanghon nahe pouvin, keiman vang ama chu kahei ajeh chu keima ama a kon kahi" atin ahi.

Jesun ama Pathenna kon ahidan hangsan tah-a aseiphat chun Judah ho akihou sommun mat ding ago taovin, hinla "aphat alhin loulai jeh chun koiman akhut alha pon ahi". Hilaija Jesun

“Ka-phat alhin lou lai” ati hi thildang ahipon Pathen’in ahinsollona mihemte huhhing dinga agon phat chu lhingjep loulai ahin ahi. Jesu matna thading go mi phabep aumjing vanguvin hiche kut lai ja Jesun thu ahilla kon chun mitam tah-in Jesu chu Pathen’a hungkon ahi tichu atahsan taovin ahi. Chuche nia athuhil ajah goh’u hilouva Jesun mun tinna melchihna anabol ho jong ana mu uva hichea konna atahsan nao kibe ahi.

II. Pa henga acheding Jesun asej (33-36)

Mi tampin athuhilna a konna Jesu atahsan jeng vangun Judah hou lamkai tampin Jesu matna thading bou chu agel taovin, hichu Jesun ahen amaho jah-a chun “Pa” ahinsolpa henga nikhat leh ache-a amahon amunom vanguva amuthei tah loudiu thu ahillin, chuleh amahon atahsan lou jeh uva tonsot lenggam jong achaa diu dan thu jong kicheh tah-in aseije.

Jesun chutia Pa a konna hung ahia chule Pa heng ma ma a akile kit ding thu asej chu Judah houlamkai hon leilam thudol toh amehbeh un “hoija bep che go ham? Ole Greek gamma Judah miho thu agahil got ham?” tin amaho akidong touvin, hinla Jesu aman lhatdamna na atoh jouva Pa henga ache ding thu aseina ahin ahi. Jesun anasei bangan lhatdamna natoh achaijin tuhin Pa jetlamna atoutan ahi.

III. Kut kichai nia Jesu thuhil kinel kal (37-53)

Lhambuh kut Judah ten kumseh a ana man jingu kichaini chun Jesun ama hintwi (living water) ahidan kicheh tah-in aseijin ahi. Ajuh chu akikhom mipi atamjo chun Jesu chu koi ahi ahelouvu chujong leh ahehon jong akisan nomlou hellu ahi. Hichu Jesun ahen “koi hijong leh adangchah chan kahenga hung hen don hen” tin asam tan ahi. Jesun hiche a twi mangcha a Judate Kut’a hung kikhom ho temna anei hi thildang ahipon ama tahsanna kisan jouse chu lhagaotheng chang uva chule hiche lhagaotheng achan pao chu midang hon jong hinna a aneidiu ahi tia hangsan tah-a chubanga nelkalna nei Judah ho lah a aphondoh ahi.

Chutia Jesun ngam tah-a aphondoh chun mipi jong chu abung bungin akikhen'un ahungkon dohna jong Pathen lekhabu a banga Bethlehehm khopi'a kon hiding ahi tin akinel taovin ahi. Hichan geija boina aum tahjeh hin houlamkai hon Jesu man dinga asollu sot tolol (sepai) hon jong kidang asah uva Jesu amat ngam louvu chu alungphatmo piuvin "nangho jong doha a lha nahiu hitam?" tin sepaiho ahousal taovin ahi. Ajeh chu sepai aman dinga asol hou chun "khuche pa thusei tobang khu koiman aseikhapoi," atiu ahi.

Chutia thunoh baotam aso lai tah-a Jesu henga jan laija anache a Jesu ana kimupi Judate houlamkai Nicodemus/Nikodim (John 3:1-21), chun Jesu chungchang thu hetchetna neilouva athemmosah uchu dan toh akitoi poi tia lamkai lenkhat ahitoh lhonna aseih mipite chu Nikodim jeng jong asosal'un ahi. Jesu hung penna Bethlehem ahijong chu seitalouvin Jesu Galilee a kona joh ahidan aseijun ahi. Houlamkai Nikodim'in jong Christa Jesu thu hangsan tah-a adinpi phat chun houlamkai hihen mipi ho hijong leh abonchaovin hiche mun chu adalha taovin ahi.

Thuchaina

Pathen'in achapa khatset Jesu Christa leiset mihem'a ahin pensah a genthei tin tang ahin thohsah ho lah-a hahsa pen loikhat hiding ginchat, chung a isei hou Jesu Pathen chapa hijeng jong leh tahsa a apenpi aneh khompi leh achen khompi asopi cheng leh anam chanpi Judah ho chujong leh Judah houlamkai hon nasataha a anot thap uleh agimbol uva thina chan apeh uhi ahi. Chutia aboljeng vangun aman atoh ding Pan anganse nahi amolson tun Pa angunga konnin eikal dot jing taovin ahi.

Sopi nangma jong Pathen lungdeilam holding nagogt nalam ahilou leh nabolna a sopi ule nao nu le pa chule lamkai tampin jong nadou maithei ahi. Achuti tah-a ahijong leh Jesun gal jouse ajo banga galjou din lungneng tah leh taona pumin pontho tah-in Pakai na tong jingute.

THUDOH:

1. Jesu ahung kondohna thudol Judah hon iti ahet um?
2. Jesun kaphat alhing hih lai je ati hi itih phat aseina hintem?
3. Judah ho chun Jesu chu hoija che ding aginmo uham?
4. Adangchah chan kahenga hung hen lang hungdon hen tia Jesun aseih i ipi aseina hin tem?
5. Mipi chun ibolla Nicodimus chu asosal' u ham?

SIMMUN – 19

THUPI: AJONPETTAH-AKIMAN NUMEINU

Bible Simmun: John8:1-11

Thulu: Amanun, Pakai, koiman themmo eichantapoi, ati. Chuin Jesun ajah-a, keiman jong themmo kachanpoi; chetan, tukallin chonsekit tahih-in, ati **(John 8:11)**.

Thumakai

Simmun masa a Jesun kut laija thu ahilna ihin simnao bantah-a hung kikoi tunia isimun'u "Ajon pettah-a kiman numeinu" 8:1-11 a ahung kikoi jeng hin Bible hetgilna nei (Scholar) ho lungthim asuboi lseh in ahi. Amaho geldan aban bannin kiseileh mi phabep chun John 8:1-11 hi John 5 sunga Jesun melchihna abolho lah-a pang ding joh ahi atiuvin ahi. Geldan chomdang khatna chun hiche hi Luke 2:38 jouva umding hilaija hi kikoikha ahi atiuvin, mi abangloi khat chun khonung tichu kumjabih somleni (12) jouva hung kihenglut bep ahi atiuvin ahi. Ajeh chu hiche chang hi houbung lamkai masa ho jong chun anaphapoh pouve atiuvin ahi. Geldan chom chom tanpi umjong leh eihon vang Pathennin amithengpa ahin manchah a hiche Jesu Christa natoh leh thilbol hi ahin sutlutna chule Pathennin ahu alhakhum ahi tihi itahsan uleh ipommu ahijeh in, hiche laija Jesun tahsa leh lhagaova Judah houlamkai ho leh numeinu chung chang thu atan bannei chan veu hite.

I. Houlamkai hon Jesu henga numeinu ahin kai'u (8:1-5)

Lhambuh kut lai tah-a Jesun thugil tah tampi ahil jouva Olivet lhangka kaltouva chua hungkile mipi ho chu thu ahilkit ahitai. Chutia Jesun thu ahil lai tah chun danthu sun ho (scribes) leh Pharisai hon ajon pet tah-a kamatnu ahi tin numei khat Jesu lungput vetnan ahenga ahin kaijun ahi. Hiche numeinu hinkaija danthu sunho hi tulaija lekhatem pentah ho toh adinmun' u kibang ahi. Chule Pharisai kitiho hi hichelai khanga amaho banga chonphat kisinsah nalamma chungnung jo umlou anahi. Tulaija tepi dingin lhagao mitah leh hou thua lunglut tah-a igel hou hi ahi. Hichan geija tahsa thu hihen lhagaothu hijong leh jana sangpen changho chun Jesu ahung patep' u (test) ahi.

Amahon Jesu chu hoilaija Kaman'in thina chan gotna kape theidem tia holle ahi tah jeh un "hiche numeinu hi Mosi dan dungjuija songa selih ding ahi" ahungtiuin ahi. Jonthanhoi hi Pathennin jong nasatah-a athet nabanna Mosin danthupeh ananeina a jong chu hitobang jonthanhoi bolho chu songa selih jeng dinga thu anapeh ahi (Lev. 20:10).

II. Akhutchalla Jesun tol ajih (6:6-11)

Jesu henga numeinu ahin kaiju hi phatah-a ivetleh achonse a angohnu' u gotna peh ding hilouvin Jesu matna ding joh chu ahollu ahi. Hiche tobanga Jesu themmo chan tei ding atiu chu Jesu dinga jong hahsa tah ahi. Ajeh chu Mosi dan dungjuija "songa selih ding ahi" tin seitale Jesu amatah "michonse ho dinga hung kahi" anati kit, chubanna Rome sorkar tailou Judah ten mihem khat thina chan gotna peh ding thu aneikitlouvu, michonse nu ngaidam'un tin Jesun seikitleh Mosi dan napalkeh'e tia themmo achan kit diu, chujong leh jonthan hoi aphal toh bang kit ding, hitia Jesu matna dinga thang akam uchu Jesu jong lungkham lleh hintin "akhutchallin tol ajih tan ahi". Jesun tol ajih hi thil suto themhon lamchom chomin noiya bang hin asuto uvin ahi;

1. Mangang tah-a thulhuhna (Decision) Pathen donglouva alah nomlou jeh ahi.

2. Danthusun ho leh Pharisai ho chu hungha lunghanguntin hiteng chule eidalhaovinte ati ahi.

3. Ajon pettah-a kiman numei nu jachat danle ahin kaihon jong lung aput dan hou chu Jesun ajachatpia tollang avet ahi.

4. Numeinu sena dinga achoiju song chun achonsetnao aphondoh u ahidan tolla chu asut ahi.

Jesun tol “ajih” ahilou leh “asut” kiti hi Greek paova *graphein* kiti ahin, hinla hiche a hin *katagraphein* akimangin hichu ileloh leh mikhat themmo chansahna thu kisun ahin, hiche hin avetsah chu Numei chonse nu chungthu Jesun asut ahiding tahsan umtah ahi. Hiche chungthua geldan phabep umjongleh “Jesun tol ajih e” tikal val adang umbek lou ahijeh-in hiche mong mong hi ahi tin ngampellin kiseileh Pathen thu kisel khel thei ahi.

Jesun hichan geija mipi athipsan jeng vang chun athu adong tei teijun ahi. Chutia mipi tinjou ahilou phat chun Jesun “nalah uva chonsetna neilou pen pennin amanu chu songin sep masa pen hen” atin ahileh mipi cheng chu apotdoh gam taove. Jesun “chonsetna neilou pen pen” ati hi Greek paova ivetleh *hamartetos* akitin hiche hin akoudoh chu “chonsetna neilou goh hilouva chonsetna lungthim jong neilou hel” tina ahi. Hichan gei lom’a jon lungthim pulou hel aumtah loujeh un Jesu themmo sah dinga hungho chu khat chengin achemang gam taovin achainan Jesu leh numeinu bou anaum tan, numeinu koiman themmo achan tahlou Jesun aheth phatnin “keiman jong themmo kachan tapoi, chenlang tukal chonse kit tahih-in” atipeh tan ahi.

Thuchaina

Ajon pet tah-a kiman numeinu mangcha-a danthu sun ho leh Pharisai hon Jesu themmo sah tei ding agotna lammun Jesu hiche numeinu chonse a kingohnu chu hilchahna le tilkhouna nasatah apehlon, hichu hiche numeinu dinga chu hinkho-a suhmil hoi ahitapon ahi.

Sopi nangma jong Jesu milungsetna leh amikhoto na hiche numeinu banga chang dia lom nahi khah tah-a ahijong leh tunin kisan'in lang, malam'in chonse kit tahih in, hichu Pakaijin nahilchahna leh natilkhouna ahi.

THUDOH:

1. Danthu sun ho leh Pharisai hohi tulaija koiho toh tekah pi thei ahidiu vem?
2. Ibolla hiche numeinu ajon pettah-a kiman nu chu Jesu henga ahin kaiju hintem?
3. Jesun "tol ajih" kiti hi Greek paova konnin ledoh inlang chule Bible a hiche kalval akisut lou jeh'a athu hi iti chai ding ham?
4. Chonsetna neilouhel ati hi Greek paova konnin ledoh inlang hilchetna pen.
5. Jesun numeinu jah-a iti kit tahih-in ati em?

SIMMUN – 20

THUPI: JESU THUHIL JUDA HON ANELKAL'U (Part-1)

Bible Simmun: John 8:13-31

Thulu: Chuin Jesu'n ajah uva thu aseki kitnin, Keima vannoi vah kahi; kanung eijuija chu muthima vahle louva, hinna vah chu anei ding ahi, ati (**John 8:12**).

Thumakai

Hiche lai hin Jesun Juda ho masangah nasatah'in nelkalna anatoh in ahi. Tahsalam pendolla Jesu amatah jeng jong Judah mi ahijeng vangin anatoh, athuhil chule athilbol dang dangho atamjon ana otcha pouvin, hoilai munna asuhkhel, aseikhel aumin kamannin thina changei gotna kape theidem tihi anangaito jingu ahi. Hitia Jesu chungu lungse aputnu phabep; Jesun 'vannoivah kahi', 'kachena-a nangho hungthei pouvin nate', 'thutah chun nalhatdoh dingu ahi', 'nangho Diabol son nahiue', chule 'Abraham masanga umsa kahitai' ati ho Judah hon anelkal nao banneichan veu hite.

I. Jesu vannoi vah ahi thudolla nelkalla aum (8:12-20)

Jesun "keima vannoi vah kahi", tia hou inna athuhilna ngamtah-a aseki jenghi mihem hina a igel leh datmo umtah ahi. Ajeh chu Judah hon ama matna ding ahol laitah u ahin ahi. Hinla Jesun kichatna neilouva aphondoh toh lhonnin "kanung eijuija chu muthimma vahle louva hinna vah chu amuding ahi' ati.

Hichea Jesu “vah” toh akitekah hi phatah a ivetleh chuche laiija Judah hon chonna dolla jan teng meivah/candle adet uva hiche vah-a chu kipa golnop thanom tah a abol theijiu chutoh jong vetchep thei ahi. Ajeh chu vah umlouva koiman jankhang laiija ima aboltheilou ahi. Hiche tobang golla chu Jesun keima vannoti vah kahi “tia aphonohna banna anungjui hon hinna amudiu ahi ati ahi. Chutia Jesun thu ahiljeng chun Pharisai ho lung asuhnoh phah lseh jeng tan ahi. Ajeh chu hiche lai khanga chu ipi chung chang thu hile thilkhat adih-e tina dinga hettosah mini ngaitei ahin chuche tilouva chu koiman thudih a anasan theiji louvu ahi. (Deut. 17:6; 19:15; John 8:17) C h u t i a Pharisai hon Jesu atahsan theilou hel phatnun Jesun noiija cheng banghin adonbutnin, keiman keima thu hettosah jong leng dihtah ahi. Ajeh chu;

- a) Hoiija hungkon kahi keiman kahei
- b) Hoilam’a kache ding keiman kahei.
- c) Nanghon vang kahung konna leh kache nading nahe pouve.
- d) Keima kachang kahipoi.
- e) Kapan eihinsol ahi.
- f) Eihinsolpa kapan keima thudol ahettosah ahi.

Chunga kisei ho banga Jesun adonbut phatnin Pharisai ho alunghangun “napa hoiija umham?”, tin thu adongun ahi. Ajeh chu amahon tahsa lamma Jesu hungkondohna Chula kicheh tah-a ahettu ahin, alangkhatna Pathen Kapa ahi atikit ding chula thi chang koiija amah-u ahi. Chutia lungphamo tah-a aumjing laijun Jesun olmo louvin adonbutnin;

Keima jong neihe pouvin Kapa jong nahepouvin, keima neihe leu chun kapa jong nahet dingu ahi atipeh tai (8:19). Chutia ngam tah-a Jesun adonbut jeng vang chun achungah koiman khut alha pouvin ahi. Ajeh chu apan tohgon aneichu Jesun amolso loulai

jeh ahi. Pharisai hon itobangin nelkalna neijong leu Jesu chu vannoti mite dinga vah khatseh, vah dihtah chule mitin salvah vah chu ahi.

II. Kachena a hungthei pouvin nate tia Jesun aseï thudolla nelkalna (21-30)

Jesun, kache mang ding chule nanghon neihol dingu, nachonset chunga nathidingu; kache na lamma la nangho hungthei lou ati (8:21). Jesun ama ache manga chule hiche achena lamma amaho achethei lou diu thu aseï chun, Pharisai hon Jesu chu amale ama kithat (suicide) kibolgo hinte atiuvin, ahi. Hiche tilouva jong John 7:35 na-a Jesun adalhah diu thu aseïna a Juda gam adalhah got hinte tia anaginmosao ahitai.

Jesun ama chungchang thu aseïho atahsan thei louhel phat chun, ama ahungkondohna dihtah “Keïma chunga kon kahi” atipehin, amaho vang chu vannotija kon ahidan’u aphongdoh in ahi. Vannotija ho chun Jesu amatah chu atahsan louvu leh hichu chonset ahin, hiche achonsetnaova athidiu dan kicheh tah in aseïpeh in ahi. Hetdinga phatah chu hiche laiïa Jesu thuhil tahsan louho chu Jesu cross a kikheneh hihlai jong leh chonsetna thidiu ahi. Aïeh chu Jesu atahsan louïeh-u ahi.

Chutia Jesun ama atahsan louvu le athidiu thu aseïphat chun, amaho chun “koi nahim?” tin thu adong taove. Hinla Jesun koi ahi chule ahungkondohna jong avelvella aseïpehsa ahitan, ahijeng vangin Jesun “Kapan eihetsah chengse bou keïman vannoti jah-a kaseï ahi ati”. Hichan geïja Jesun aseï vangin ahethao lunghtim chun ahethi dehton, hichun Jesun ama cross a akikhetbeh tengle ahin tahsan diu dan aseïjin ahi. “Ahin tahsan diu” kiti hi Jesu chu Pathen chapa mong ahi tia atahsan sohkeï diu tina hilouvin ama themmo na neïlouva vannoti dinga athi jal chu ahi.

Mipi ho leh Pharisai ho masang chun Jesun jatchom jepmin ahinsolpa apa toh aki guïjop lhondan; “eïsolpa Pa chun ei umpi nai, kachangin eilha poi, keïman ama lunglhaina jengbou kabolle” ati. Chutia lamchom jepma Jesun aseï chun mipi ho

lunghtim chu atongkhan alah uva mi tamtah-in Jesu chu Pathen'a hungkon, Pathen chapa, chule vannoti mite dinga hung ahi ahe chennun atahsan taove. Hiche a atahsan dan uhi tunia nangle keijin kicheh tah-a itahsan tobangu vang ahipoi. Ijeh inem itile, Christa Pathen chapa mong ahi ahetao chu lhasam jepna lai ahi. Tunin eihon vang kichet tah-a Christa tah chu tahmel'in muhih jongleu hen, amilhat damna natoh-a konna ihet chen'u ahitai.

THUDOH:

1. Hettohsah thudol chom chan pen.
2. Pharisai hon atahsan theina diuva Jesun ama chungthu ijat aseijem?
3. Jesun kachemang ding tia aseihl Pharisai hon iti lamdolla anasan um?
4. Jesun apa toh akiguijopna lhondan iti aseijem?
5. Jesu thuhil mitampin atahsan dan uchu itobang tahsan ahidem?

SIMMUN-21

THUPI: JESU THUHIL JUDA HON ANELKAL'U (Part 2)

Bible Simmun: 8:31-59

Thulu: Jesu'n ajah uva, Keiman nangho tahbeh beh-a kaseipeh nahiue, Keima Abraham masang peh-a ana umsa kahitai, ati

(John 8:58).

I. Thutah in nalhatdoh dinguh ahi tia Jesu thusei nelkalla aum (31-38)

Jesun athuhilna a kon hin tahsan ho jah-a chun "thutah chu heuvin natin, hiche thutah chun nalhadoh dinguh ahi" tia aseijonghi hungmoh umding ahipon, Jesu atahsan nao chungathua aumjinguva ahile seijui tahbeh hidu, hiche jou teng chule bou hiche thutah chu ahedoh diu, hichun alhadoh diu thu bou ahi.

Hitia Jesun aseichu alungphatmo pi taovin, "keiho Abraham chilhah kahiuvin, imatih channin koima soh-a kaumkha pouve; nakilhadoh dinguh ahi nati chu iti nati ham?" tin Jesu chuanelkal taovin ahi. Hetdoh dinga phatah chu amaho tahsan lamma Abraham chilhah ahiu chu dihtah ahi, hinla Jesun tahsa thulam hilouva lhagao lam thu-a ama tahsan tahbeh ho chun chamlhatna dihtah amu diu chu aseina ahi. Tahsa lam thudolla Jesu amatah jong chu Abraham chilhah hijeng jong leh lhagaothenga kona hung kijilla, vannoti mite chuleh Abraham chilhah te chonset soh-a konna lhadoh dinga hung ahi.

Rom. 3:23 na-a “ajeh chu mijouse chonse a ahitai, Pathen loupina chu changlella ahitaove” tia Paul’in aseï banga hi mihem tia peng taphot chu chonse ahin, amaho chu chonset soh-a um ahiuvin hichu lhadoh/lhatdamna ngaicha ahiuvin, hichena dinga chu chapa amatah chun bou afeh thei ahi. Chonset soh-a aumnaova kona lhadoh thei chapa chu tha dinga agotjing jeh uchun, Jesun hitobanga lungthim pua aïtih-a chonse jing Diabol “napaova kona namu chengseu nabollu ahi,” atipeh tan ahi.

Tahsa lam dolla Judah te Pathen namlhen ahinao akiletsahpi lfeh jeng jeh uva alhagao lammu mit ana cho kha ahitan, hiche amitchotnaova konna mit ha doh sah thei mikhat um Jesu anasan nomlou hellu ahi.

II. Jesun Diabol chilhah nahiuev atï thudolla nelkalna (39-41)

Judah hon chutia Jesun lhagao lam thu aseï ahët thei louhel jeh un amahon Jesu adonbutnun “Abraham chu kapao ahi” atiuvin ahi. Hinla Jesun tahsa lam pendol hilouva lhagao lamma Abraham chate hileu chun Abraham bol bol nabol dingu ahin, tunla hiti chun nachon pouve atipeh-in ahi.

Jesun hitia ahouset phat uchun Judaho chun “keïho jaocha kahipouve, Pa khatseh bou kaneïjui hichu Pathen ahi” atiuve. “Jaocha” kiti hi ahung penna anu le apa kicheh lou ahi. Eiho Thadou hon kiseïle Abraham cha kahilouvu leh “thinghom songhomma kivodoh kahiu ham” tia Jesu ana kidonbut maithei ahi. Judah hon Pathen chu Kapa ahi atiuva ahinsol achapa Jesu angailut theïlouhel uchu Jesun ahën napao Pathen ahïle keïma nei ngailut dingu ahi, ajeh chu aman keïma eisol ahi atipeh in ahi.

Achuti tah jeh chun Jesun “napao Diabol’a kon nahiuvïn, chuche napao lunggot chu suh bulhit ding bou nagel’un ahi” atipeh in ahi. Diabol hi Greek pao *Diabolos* akonna kiladoh ahin, amahi thutah douvah Joupa chule mihemte lhagao leh tahsa a thina chan pethei pa ahïlou le apepa ahin, Adam le Eve lhëmlha jong chu ahi. Diabol min dang chu “Satan” Greek ten *Satanos* atiuvin ahi.

Jesun hichan geija thilse hungkondohna pa Diabol napao ahin, ama lunggot bou chu suhbulhit ding nanommui ati ahi. Hijeh chun Jesun, chang⁴⁴ na-a Diabol chu; tolthat, thutah-a dinglou chule Joupa/Mijou ahi ati. Hitobang chilhah ahidiu chu amaho dinga jong gellhah hahsa tah ahin ahi. Jesun hiche Diabol toh kikal hellin “keiman thutah kaseijin, nanghon neitahsan pouve” atin ahi. Hitia Jesun thu tampi aseijeng vangin Samaria mi nahin thilhavop nahi atikit taovin ahi. Jesun thilkidang abolho hi amaho gella thilha kithopi na-a abol danna angaitouva chule anangoh-u ahi. Chutia Jesu ngohna jat tampi asem lai ju vin Jesun aman ahil, Kipana Thupha nit chan chu Lhagao thina atepkhah lou diu ahi tin ngam pellin aphonhdoh in ahi.

Jesu thuhil ngailha a Judah te chu pendolla Abraham chilhah hijeng jongleu alungthim uva tolthana lungthim leh phatlouna lungthim tampi akennu apailhah uva Jesu huhhingpu atahsan uva hinna anei diu hi Jesu amatah in adeijeh a hichan geija hi thuhilna anei ahi.

III. Jesun Abraham masanga umsa kahitai ati thudolla nelkalna (52-59)

Hiche lai munna hin Judah hon Jesu thuseija konnin thilhavop nahi atipeh kit taovin ahi. Ajeh chu “kathu nit chun itih chan hijong le thina atepkhah lou ding ahi” ati pansat na-a aneiju ahi. Chutia angohna bannun apuluiju Abraham leh themgao dang dang ho toh atekah un, hijeh chun Jesun “Napuiluiju Abraham’ in keima nikho amunom toh lhonnin amun akipahlleh jenge” atile Judah hon tahsa a leisetna ahung penna pat akum to atekah-un “kum somnga bon lhing lou lai ja Abraham namutah em?” tia a el ella ahousetnu ahi.

Chutia ase i phatnun Jesun “keima Abraham masangpeh-a umsa jing kahi” atin ahi. Hichea Jesun ase i hin avetsah chu Abraham hihen themgao dangho hijongle amaho sangin kachung nung joi atina ahi. Atahbeh-a Jesu chu leisetna ahung pen masang peh-a Pathen ana hisa, anaumjing ahitan, mihem ten lhatdamna

angaichat jeh uva hung kineosah-a leiset mihem lim pua numei sunga hung penga mihemte eihung lhatdoh-u ahi.

Thuchaina

Vannoi chonset pomang dinga pan ahinsol chapa Jesu Christa leiset chung a hinkho chomcha ahin manna sunga hin genthei lengvaina tampi ahideh-a asopi hoa kon bolgentheina ato chung a iseihou banga hi, tunia sopi nangman jong athu in nelkalna neihih jongle chun nunchan khan channa nitin nahinkho manna a athuhing toh kitoh louva nachon jing ji em? Nana chon khah tah a ahile Jesu Judah ho chung a akipa lou bangin nangma chung a jong akipah poi ti hen lang ama heng hinbel tan.

THUDOH:

1. Athuhil hintahsan ho jah-a Jesun ipi anaseipeh em?
2. Judah ten ipi ahiu chu akiletsahpi uva chule akiletsah nao chun ichana asuhmo uvem?
3. Jesun Diabol chung chang thu aseiho ipipi hin tem?
4. Greek paova Diabol le akibahpi min dang seijin.
5. Jesun Abraham masang peh-a umjingsa kahitai ati hi hilchetna pen.

SIMMUN – 22

THUPI: JESUN APENNA MITCHO KHAT KHO AMUSAH (Part-1)

Bible Simmun: John 9:1-17

Thulu: Sun ahi petcha hi eisolpa na katoth ding hivehta. Koiman na atoh thei louna jan hung lhung ding hitahi. Vannoi'a kaum laise-a hi vannoi vah kahi, ati (**John 9:4,5**).

Thumakai

Isaiah themgaovin, Messiah chun melchihna tampi abol ding ahi ati ho lah-a “mitcho ho jong kho amusah ding ahi” tia ana sei bangin, tuni simmun'a hin Jesun melchihna kidangtah vannoija jong anasoh kha louhel “apen a pat mitcho kho anamusah in ahi”. Hichea Jesun melchihna abolna a hin “keima vannoi vah kahi” tia aseih leh athil kidang bol chung changa Juda lamkai hon Jesu nelkalna thu aseih uva mitcho kho mupa chungana anatoth hou leh kho hinmu pan Jesu atahsan, abancha imudiu ahi.

I. Mitcho pan kho amu (9:1-7)

Hichea Jesun thil kidang abol hi aphot tah chu kicheh tah-in aseipon, hinla hiche phat hi Lhambuh Kut leh Houin thensona Kut kakah ahiding tahsan ahi. Hichea hin Jesu leh aseijui hon alamjot pet tah-un “apen'a patna mi mitcho khat amuvin” aseijui hon Jesu jah-a mitchopa chu “ama chonse ha anu apa chonse ham tin adong taovin ahi”. Hiche a seijui hon Jesu hitobang thudoh adohnaova kon hin Judate/Israelten apu apa khanga pat ahin

tahsannu “anu apa chonset khangthum chan geija atu achate chungu achuh” akimudoh-in ahi (Ex.20:5; Num 14:18; Deut. 5:9; Jer. 31:29; Ezek. 18:2).

Seijui hon apu apa teo khanga pat ahin tahsan’u chu Jesun adonbutnin “ama chonse ahipoi, anu le apa chonse a jong ahipoi, hiche hi Pathen natoh kiphonna dinga ahibouve” ati. Jesun seijui ho lung opkaina asuhteng peh jouvin “sun le jan” aseijin ahi. Jesun ‘sun’ atih, apa Pathen’in alungdeilam tohdoh sahna dinga phat apesh sung atina ahin, hiche sunga hi pan anganse chengse atoh ding thu asej ahi. “Jan” ati hin, Jesu amatah leiset mihem’a ahung penna atahsa hinkho abei ding aseina ahi.

Jesun atahsa hinkho abei kah-a ahinsolpa apa na atoh ding dan aseijou toh lhonnin “keima vannoi vah kahi” atin ahi. Hichea Jesu vah toh akitekah hin, mihemte chonset a konna ahuhdoh avetsah ahi. Jesun ama chungthu aseitoh lhonnin achilla bonlhoh asemin mitchopa mitna chun aloijin Siloam twikul’a agakiphet lhahsa in ahileh apesh petnin mitchopan kho amutan ahi. Gah hetbe dinga phatah chu hiche Siloam twikul mitcho pan amitna bonlhoh agaphet lhahna mun hi Jerusalem khopi noilamsang hija ahi. Jesun bonlhoh/leingan alah-a mitchopa mitna aloipeh-a kho amusah a konnin Genesis 2:7, a Pathen’in leingan a konna mihem pa ahinsem chu geldoh ahi. Mitcho ho goh hilouva Jesun mithi ho jong ana kaithouva chule John 1:13 leh Col. 1:16 langa imajouse ama vanga kon chule ama sem ahidan jong muchet ahi. Hiche thilsoh a konna hi Jesu Pathen ahina kilang dohbe ahi.

Jesu Christa chun thilbol theina tampi neijong le aboldam ding mitchopa chu nom tahih henlang hileh kho amudehlou ding ahi. Jesun abol ding dol abolla mitchopan jong Jesu thupesh bang banga bonlhoh amaija kiloi apesh lhah tah jeh-a chu kho amua damna anei ahi. Tahsan chaten jong Pathen thupesh init ji tengule apesh hahsaji lësh jong le khonunga dinga hamphatna ahijin ahi.

II. Mitcho pan Jesu thupeh a konna kho amu chungthu aphondoh (9:8-12)

Hichea mitcho pan kho ahinmu jeng phat chun mipi masanga lamkon tinna akhutdo anamujiho lungthim asuboi tan abang chun, hiche pa hi khutdo jipa ahi atiuvin, abang kimkhat chun ahipoi atiuvin, achom dang khat ho chun, ama hi hileh akilomme atiuvin, hon (party) thum akiso taovin ahileh, amapa amitchohna konna kho hinmu pa chun “keima ama chu kahinai” tin mipi lung opkaina chu aseichet peh tan ahi. Chutia ama pan “ama chu kahi” ati jou chun “i-atile namit hah ham?” tin thudoh adongun ahileh amapan, Jesu thupeh angaija konna kho ahinmu chu kicheh tah-in aseipeh tan ahile mipi chun amit hadohsahpa Jesu chu ahol taovin, hinla amapan Jesu chu hoilamma che ahi kahetapoi atin ahi. Jesu hoilamma ache ahettlou dan hi mi phabep min amit hadoh masanga hi Jesun hichepa hi adalah hitadiham tin lunggel aneijun, ahinla alangkhatna chu hiche a amit chotna a konna kho hinmu pa jong hin Judaten Jesu thilbol ho apomnom loudan ahett jeh-a jong Jesu chena jong chu a-im ahi.

III. Pharisai ho henga mitcho kho hinmu pa apuiju (9:13-17)

Thilsoh chu agimnei behset phat chun mipi ho chun amapa chu Pharisaiho komma dingin apui taovin ahi. Ajeh chu Pharisai ho chu chuche phatlaija chu Judate hou lamkai chule Pathen thu phatah-a ahett goh-u hilouva jui jong anajuiju ahi. Amaho (Pharisai ho) kom alhunnun thudoh aneijun ahileh amapa chun “bonlhoh kamit anun hiche kaphett lhah le kho kamu jenge” tin donbutna masa apeh bang chun adonbut kit tan ahile Pharisai ho jong chu hon (party) ni akiso kitnun, khatna ho chun Sabbath (cholngah) nikhoa hitobang melchihna bol thei chu Pathenna kon ahipoi atiuvin ahi. (Deut. 13:1-5) Ajeh chu Sabbath nikho theng tah a nanit ding ahi tihi Mosi danthupeh ahi. Pharisai anina ho chun michonpha Pathen’a kon louvan hiche tobang thil kidang hi bolthei ponte atiuvin, Jesu chu sangtah-in agel taovin ahi. Lunggel kibah lou jeh chun Pharisai ho group ni akiso taovin ahi.

Chutia Pharisai ho amaho sunga kinelna aumphat chun amapa kidong leh phante tin “namit ha sah pa chu nangman koi ahi nati em?” tin adongun ahileh, amapan “themgao” ati. Amapan amit hadohsahpa “Themgao” ahi ati hin avetsah chu phat khat lai ja chu Israel te chu themgao hon anapoh goh-u hilouva themgao hon anapoh thil kidang tampi anabol hou jong chu ahet ahi. Pharisai hon hiche thilsoh chung a boipiu pen tah chu Sabbath nikho ahilou leh amit kihadohsah pa chu ahipon amavang Jesu Christa chu Pathen’ a kon tahbeh ham ahilou leh thilhavop ham? tih ahipennin ahi. Hichea Pharisai hon athupipen’ a ageldiu chu mitcho khatnin kho ahinmu chu hiding dol chu ahi.

Pathen’ in thil kidang ama a ding leh japi a dinga abol ho chung a kipah louva phunchelna leh kibung khenna chuleh Pathen taitomna-a manga tahsan chate hiche Pharisai ho tobang tulai tahsante lah-a jong umjing ahi.

THUDOH:

1. Jesun mitcho pa kho amusah phat hi itih lai hinte nati em?
2. Jesun sun le jan ati hi chomchan hilchenin.
3. Mitcho khutdo pa chung thua kinel mi ho (party) thum ho lunggel seijin.
4. Pharisai ho (party) ni kiso ho chun Jesu natoh chungthu iti ti aseu uvem?
5. Akiboldampa chun Jesu chu koi ahi atia, chule hichun ipi avetsah ham?

SIMMUN-23

THUPI: JESUN APENNA MITCHO KHAT KHO AMUSAH (Part 2)

Bible Simmun: John 9:18-41

Thulu: Jesu'n ajah uva, Mitcho hileu chun nachonset nao umlou ding ahin; tu vangin, kho kamui, nati tah jeh-u chun nachonset nao aumtan ahi, ati (**John 9:41**).

I. Mitcho pan kho amu thudol anu leh apa adoh'u (9:18-23)

Mitcho pan kamit hasah pa chu "themgao" ahi ati jeng vang chun Judah ho le ahou lamkai (Pharisai) ho chu alungbi thei deh pouvin, hijeh chun mitcho pa nu leh pa chu akouvun, "amahi nachapa lhon chu ahitahleh tua hi iti kho amu ham?" tin adong kit taovin ahi. Athudoh uchu anu leh apan adonbut lhonnin, kachapa lhon ahin iti kho ahin mu ham kahe lhonpoi ama dong taovin upa tah jong ahitan achung thu kisei thei ahitai atipeh lhonnin ahi.

Judaho chun Jesu Christa themmosah-a mat tei ding tihi anagot jing sao ahi. Jesun mitcho pa kho amusah keuseh hilouva melchihna dang dang jong anabol ahitan, hiche athilbolna a konna chu Judah ho lah-a mi phabep jong chun ama hi "Messiah" Pathen'a konna hung ahi tihi ana tahsan sao ahitai, hiche tobang tahsan akibe lou nading chu Judah lamkai ho chun Jesu chu "Messiah/Christa" ahi ti phongdoh chan chu kikhopna in (Synagogue) a konna ndoh dinga thulhuhna ana nei sao ahitai. Hiche a athulhuh-u kichat jeh chun anu leh apan jong Jesun achapa lhon chu amit aha sah ahi tilouvin, amajoh kidoh un tin avellin Juda lamkai ho chu adonbut kit lhon tan ahi.

Tuchan geija John gospel ihin sim naova hin Jesun bolsetna leh nelkalna tampi ahintoh in, hinla hiche laiija ama natoh leh ahina ngam pella phongdoh ho Synagogue a konna nodoh ding kiti hi thuthah beh ahung hitan, hiche a Judahon thulhuh asem'u jonghi bol jong abol jengu abanna imu diu ahi.

II. Ani vei na-a Judah lamkai hon akibol dampa akihoulimpi kit'u (9:24-34)

Akibol dampa nu leh pan ajou leh kikhopna inna konnin ei kino doh khante ti kichat na jalla Judah lamkai ho achapa lhon komma alesol kit banguvin, lamakai hon jong akibol dampa akimupiu vin, naboldampa chu "michonse" ahi keihon kaheuin, amasang chun Pathen joh vahchoijon tin aseipeh taovin ahi. Chutia lamkai hon husa thim tah-a anotho jeng vangu chun amapan "mitchon tun kamutai" tia vahchoi la sem pan ngei tah-a asem isahjiu bangun, "kamit achon tun kho kamutai" hiche bou hi kahet ahi, tin adonbut tan ahi. Akiboldam pan hitia aseijeng vangun chun amasa-a anadohsao "namit ahahsah a chu i nalo em" tin adong kit taovin ahileh amapan phamo asan "nangho jong ama seijui nahi nommu ham?" tin adonbut nin ahileh amahon keiho Mosi seijui kahiuvin, amapa vang hi kahe pouve atiuvin ahi. Israelte dinga aitih a asuhmil thei louvu Mosi Egypt gam'a konna hinpui doh chule Pathennin thusom anapeh chu ahi. Judah lamkai ho chutia kisong tah-a thu aseijeng phat uchun, akiboldam pan lamkai ho chu noiija bang hin donbutna apen ahi;

- a. Kamit ha sah ta-a akonna nahet louvu chu datmo aum'e.
- b. Pathen'in michonse ho thu angaiji poi.
- c. Vannoi kistem tilla patnin apenna pat mticho kho kimusah lam kahepoi.
- d. Kamit ha sah pa chu Pathen'a kon ahi.

Chunga kipe ho banga adonbut phat chun lamkai ho alung phamo uvin "nang napum changa chonsetna penga, keiho neihil um" atiuvin anodoh taove. Judah ten akhang akhanga anatahsan'u

hitobang pengsol ho hi anu, apa ahilou le ama chonse ahi ana tiu ahi. Hiche tobanga agel paovin ale hil'u chun alung hansah un" anodoh taove" akitin ahi. "Anodoh taove" kiti hi hoilai munna konna anodoh uham tihi phatah-a ivetleh amaho kikhopna-in (Synagogue) ahiding tahsan ahi. Ipi dinga anodoh uham iti leh ama pan, Jesu aboldam pa chu Pathen'a kon ahi tia lhang phong tah-a aphon doh jeh ahi. Hiche tobanga kino doh ho hi Bible hethem hon lam chom chom min aseï khen'un. Hiche Synagogue a konna kinodoh hohi apatna ahin, hichi hi hou lamkai khatnin jong abolthei ahin, abanna houthu lam hihen tahsa kiloikhomna chuleh khopi sunga kon hijongleh nodoh nathei thaneija chu Sanhedrin lamkai hobou ahiuve atiuvin ahi. Amahon anodoh hou vang chun ain alou adalah jiu ahitai.

Jesu Christa Pathen'a kon ahitia Judate Society akonna kinodoh hohi John'in alhamon nomjeh a hiche lekha hi athot ahi tia Scholar, (John gospel hetgilna nei) tampin jong aseijin ahi.

III. Jesun akiboldam pa akimupi (9:35-41)

Akiboldampa Synagogue a konna akinodoh tai ti Jesun ajah phatnin, hiche mipa chu Jesun akimu pin, hinla aboldampa chun Jesu chu anamel hetpon ahi. Thu masa lamma kisei banga chu Jesun amit aha dohsah jouva jong chu Jesu mel chu amu manlou ahitai. Chutia Jesu mel amulou jeng vang chun hitobang thil kidang datmo umtah achunga chuhsah pa chu Pathen'a kon mong mong ahi ti chu tahsan'a lentah ana nei ahi. Atahsan let behset tah jeh a kikhop khomna inna konna nodoh ahitai ati chu Jesun aheth keuva ama pa hi ngailutna nasatah anei ahi.

Jesun angailut jeh chun akimusah in "Pathen chapa chu natahsan em?" tin Jesun adongin ahile chung a kisei banga kinodoh ahinle dam pan Jesu chu anahe tapon hinla Jesu ama tah Pathen chapa ahi aseipeh phat chun "Pakai katahsan'e" atin Jesu chu ahoutan ahi. Akiboldam pa Judah hon ahin del doh uchu ama dingin huhhing channa ahung hitan ahi. Ajeh chu Jesun akinodoh ahethna che-a aga kimupia thilsoh umdan aheth them sah phatna aman jong hangsan

tah-a “Pakai katahsan’e” tia aphon doh-a chule hiche toh lhonna Jesu chu chibai aboh/ahou ahitan ahi.

Jesun ami boldampa toh akihou jouvin mitcho pa kho amusah thilsoh chu mang chan Pharisai ho chu tahsa a jong khomu ahiuvin, chule houthu lamma jong chu khomu danna kingaitouva ahi. Tahsa le lhagaova khomu danna aum jeng vanguva Jesu natoh le a Pathen hina ana dou jeh uva chu Jesun mitcho toh anatekah ahi. Alangkhatna apenna mitcho pa vang chun tahsa mit ha na leh lhagao mit hadohna anei ahitai.

Chutia Jesun amaho ahouasal phat chun alung phamouvin “keiho jong mitcho kahi u vem?” tin Jesu chu anelkal taovin ahi leh Jesun “mitcho hileu chun nachonsetnao umlou di ahin, ahin tun kho kamui nati jeh uva chun nachonset nao uma ahitai” tin adonbutnin ahi.

Chunga Jesun Pharisai ho ahousetna a konna mudoh thei chu, Jesun chonse atiho hi thil jat chom chom bolho ahipon, amavang Pathennin ama chapa vannotija atohgon subulhit dinga ahinsol tahsanna kisan nonmlou ho aseina ahi. Hiche ama Pathen chapa ahi tia tahsanna phongdoh amit kiha doh sah pa chu chonpha kisimma chule kho la mua hija Jesu ama tahsan lou Pharisai ho chu chonse ahiuve tia Jesun aphondoh ahi. Hiche tobang golla tulai Christian tampi jong mit hah danna uma, ama vang Christian chonpha a asimlou atammin ahi.

Thuchaina

Jesun apenna patna mitcho pa aboldam hi gelthuh na behseh nei louva thusim simma isim leh athupi dan hi akimudoh jou pon ahi. Ahinla chung a ihin seihou jouse phatah a nahin sim jouva namu doh dinga tahsan chu; Jesu Christa a Pathen hing mitcho pan Pharisai hon amah piuva akiboldam pa adelmangu hi akiboldampa avet dao ahipon amavang Jesu Pathenna kon ahi ajah nomlou jeh-u ahi penne.

Thilni tahsan chate dinga manchah dinga pha chu “akibol dam pan genthei ding ging louva Christa aphondoh jeng banga hi Christa hi Pathen hing chapa mong ahi tia genthei ding ging louva ium nao channa iphondoh uva chule akin ibol nah um? Chujong le Pharisai hon thutah tuhdet jeh a ahat lou le apao joulou pa themmo chan goh hilouva alah uva konna anodoh jeng banguva mihem thutah choi panpi ding neilou chungu natch thilbol dihluo naneijem? Aneikha nahi khah khat tou leh tunin ilhagao mit’u hadoh sah-u hitin Pakai loupai nadin hinkho mang tao hite.

THUDOH:

1. Koi tobang ho chu Synagogue a konna nodoh dinga Judah lamkai hon thulhuh na anasem uham?
2. Akiboldampa henga chu lamkai hon naboldampa chu itobang mi ahi atiuva chule akiboldam pan ipi bou kahi ati em?
3. Akiboldam pa hou lamkai hon jat li a adonbutna bannei chan seijin.
4. Judah hou lamkai ho chun Jesun aboldam pa chu hoilai munna konna chule ipi dinga anodoh-u hintem?
5. Pathen’in michonse atiho chu koiho hiuven?

BIBLIOGRAPHY

- Barclay William, *The Daily Study Bible: The Gospel of John*. Bangalore: Theological Publication of India, 2004.
- Barret C.K. *The Gospel According to St. John*. London: SPCK, 1978.
- Carson D.A. *The Gospel According to John*. Grand Rapids: William Eerdmans, 1991.
- Carson D.A., R.T. France, J.A. Motyer, J.G. Wenham. *New Bible Commentary*. Secunderabad: OM Books, 2005.
- Filson Flyoyd. "Who was the BD?" *JBL*, 68 (1949).
- Guthrie Donald. *New Testament Introduction*. Illinois: IVP, 1964.
- Harris W. Hall. *The Gospel of John Introduction and Commentary*. The Bible Studies Foundation (www.bible.org).
- Kruise Colin G. *Tyndal New Testament Commentaries Vol. 4 John*, ed. Leon Morris, Illinois: IVP, 2003.
- Michaels J. Ramsey. *The Gospel of John NICNT*. eds., F.F. Bruce, Gordon Fee, Grand Rapids: William B. Eerdmans, 2010.
- Morris Leon. *The Gospel According to John, NICNT*. Michigan: William B. Eerdmans, 1995.
- Sanders J.N., and Pierson Parker "John and John Mark," *JBL* 79, (1960).
- Singson Dongkhothang. *Bible Dictionary in Thadou*. Imphal, J.B. Printer, 2006.,
- Walvoord John F., Roy B. Zuck. *Bible Knowledge Commentary*. Hyderabad: Authentic Books, 2013.
- Westcott B.F. *The Gospel According to St. John*. Grand Rapids: Eerdmans, 1978.